

Nwàk nè Wo à Còm Fa Bùu HIBRÛ wèŋ

Wo à còm fa nwàk ènə bohòbòop Krətèeŋ sè wo bùu Hibrù wèŋ sè ngə' à sə vè bohòwo wùriŋ. (Wo togè bùu Hibrù sə də bùu Jus sè'.) Yà'a sə yəəŋ co də wo nə yamak dzədzəm nè Krətèeŋ wèŋ tse' nà' bohòJisòs nə. Nwə nè yi à còm nwàk nə à sə kwe'sə wo, nə sə tip wo də yà'wèeŋ təəŋ gɔgɔŋ bə dzədzəm nè yà' tse' nə.

Yi duk fa yà'wèŋ də Jisos Kreest nwə nè Nwì à tum vè yi ngònitsə' fa bwiŋ mɔmvə'nə Nwì cu sə. Mɔmvə'nə yi mo Nwì fana ye də fàak ye sè yi à sə gùu yam càsə bum pwe' sè wo à sə gù yà' ŋga cu ntòmvək nè bwiŋ à sə yù lùuk sè zəm sə. A yà'sə də yi yam càsə ŋgàa tsòhòbum Nwì bə masinjàa Nwì, nə ye ŋgàa fa satikà' kè Musi àlè' sè'. Nà'a njo nè wo tse' ŋgòlòmantombi bə dzədzəm awo ŋga wo sə naaŋ tu bohòJisòs nə.

Mbùp nè hum-ncòp-mò'fis ndzə mvwe' nwàk Hibrù ènə sə cèp də, mandzè nè co nwè gɔ Nwì kwa mègù ŋgòtse' dzədzəm nə sə naaŋ tu bohòyi. Nà' sə taŋsə bwiŋ ŋkùuŋ sè wo à tse' nsàp dzədzəm nè Nwii kwagè bə zeŋ nə. Mbùp sè ba sè yà' lèsə nwà' ènə sə cèp mvəsè bùu sè wo sə yù mandzè Nwì tse' ŋgòcu ncu àwo sə nze fɛnə.

*Nwì Tsə' Lèsə Fa Bwiŋ Ncèp Ye Cùhu Mo Ye
Nə*

¹ Nwì ànə cep to mantombì fa'a bohòtácicii avès bə nsàap mandzè zok zok. Yi à cèp bohòwo vé'nə kè' ñkùuñntèñ. Yi à sə tsə' bwì ncèp ye nə cùhu ñgàa tsòhòbum Nwì wèñ.

² Nə ye də bə nùumbu sè yà' sə lèsə lòyè'e yi a cèp bohòvès mok cùhu mo ye nè yi a tum vè nə. Yi gù mo ye nə ñgòtse' ñàñ bə bum ye pwe'fo'. Yi à gù bum pwe' sè' ndzə bohònà'.

³ Bèbo nè Nwì nə sə rɛɛñ yəəñ mɛ lisè bwì bohòyi nə. Bwì yə yi, fana wo rìñtse' nsàp ñwè nè Nwì cu nə vé'ɛ pwe' nè pwe'. Nzenḡònə cu mali fo' yè'sə sè' bùu ncèp mo ye nə, nè nà' tse' ñàñ nə. Ghà nè yi à gù rɛñsə fis wes fa bwì bup awo fana yi lo kə cum yuye mɛbu bo ma mà'a Nwì nè yi mañḡəñḡèñ, nə sə sak tsoñ ḡaḡ ye mbwa.

*Mo Nwì Gha'
Masinjàa Nwì Wèñ*

⁴ Mvè'nè yi cu bo ma mà'a Nwì yà'sə fana yi yam càsə masinjàa Nwì pwe' yi. Vès rì vé'nə bùusè liñ sè Nwì a fa yi sə yà' yam ghak liñ masinjàa Nwì sə wèñ pwe'fo'.

⁵ Nwì bə tu ye à ka bohòmásinjà ye mòk nùumbu mòk duk yuk fa də,
<<Wu yè'e mo àm. Ye jəñ ntinə, nə lo mantombì,
mɛ yè'e tè' yo.

Mvè'nè yi à duk də,

Mɛ nə ye tè' ye, yi ye bwi mo àm>>

nə, yi ka bohòmásinjà mòk vé'nə duk. Mègù Jisòs yìyi nè yi a cèp yuk fa nà' nsàp ncèp ènə.

⁶ Yumok ye fe'lə sè' də, ghà nè Nwì à də yi nə tum vesə motu ye nə sə nzenḡònḡ fana yi cep də,

<<Masinjàa Nwì pwe' kuksə mo ye nə.>>

⁷ Yusə ghaŋ sè yi à cèp yuk bə liŋ masinjàa Nwì də,

<<Yi gù masinjàa ye co fèfə, nə gɸ bwe fàak ye yè'sə wèŋ co ləm-mis.>>

⁸ Nə ye də ma nè mo ye nə fana Nwì à to nà' bə liŋ sè ye mvè'nè yi à cèp də,

<<Nwì, wu nə cum mam mənə kapràak ŋkum mvèsè nè mvèsè.

Wu nə sə sak gaŋ yo sə bə mandzè nè nà'a zìnə.

⁹ Wù dzəm mègù bum sè yà'a kəkərè mandzè nè Nwì,

Nə beŋ yusə aco yà' gɸ bɸpsə lùk nè Nwì nə pwe'fo'.

Nà'a njo nè Nwì nè yi Nwì yònə a gù wu də wu yam,

Nə tse' kwəkwa nè nà' càsə sè ŋge' yo mok sə wèŋ pwe'fo'.>>

¹⁰ Yumok sè yi à cèp fe'lə bə liŋ mo ye sə də,

<<Tà, a wù nè wù ànə gɸ nzeŋgòn,

ntòbu sè' bo fàha yo.

¹¹ Wo nè bisə ŋgwàŋ, wù cum mali yòfo'.

Wo nə vəp co cək nè nà' rèŋ laŋ.

¹² Wu nə lim beŋə wo co cək.

Wo nə kupsə, wù mam yòmvè'nè wù cu.

Lùmŋgòoŋ yo nə kà ye kè mè yuk.>>

¹³ Ncèp mòk nè Nwì ka nà' bohòmasinjà ye mòk cəp yuk fa sè' də,

<<Cum bo ma mà'a mù fəeŋ

Tètè mɸ nə gɸ bùu sè wo sə bèŋ wu,

Wù nəŋ tes kù mɸ tuhù wo.>>

14 A ye-a ve'nə fana ye də masinjàa Nwii yè'sə ndà wèŋ? Wo mègù yòŋsəə sè wo gùgè fàak Nwì. Wo tesəgè bùu sè wo nè tse' lùŋ.

2

Yu'rə, Nə Kij̄tse' Ntirə Nè Bəboŋ Nə Cùk

1 Nə ye də a riŋtse' də mo ye nə yam càsə masinjàa Nwì wèŋ ve'nə fana nà'a njo nè a kə'ə ntu' bə ncèp nè a yuk nà' nə, ya kà də a yeto ŋgòmərə nə sə me'rə kok nà' duk.

2 A rì də ncèp nè masinjàa Nwì wèŋ à jə vè fa bwì nè tse' ŋàŋ. Nwè nè yi à ka ncèp ènə noŋsə pwe' à tse' ŋgə' kəkurè.

3 Vesùwèŋ nə rì nə ve'nə fana ye də ncèp nè co a nə swirə fuk ŋgə'ə bùè, ŋga a yuk-a ncèp lùŋ nè Nwì nè, nə kà mbeŋ kòm na. Tà Jisòs ànə tsòho to ncèp ènə yi bə tu ye. Bùu sè wo ànə yuk ncèp nə à nitsə' sè' də ncèp nə nà'a zìnə.

4 Nwì à sə nitsə' ye sè' də ncèp nə zìnə bə mandzè nè yi à sə gù nsàap maŋgəŋgèŋ zok zok. Nə ye də yi à gəpsə fa bwìŋ ŋkərè nè nà' à vè bohòYòŋsə nè Rərəŋ sè' mvè'nè yi dzəm.

Jisòs A Bùuŋ Nwè Ya Yi Tsok Fa Bwìŋ Mandzè Lùŋ

5 Nzeŋgònè nà' cu ŋgòvəə, nè vès sə cèp bə zeŋ nè'nə, Nwì à ka nà' də masinjàa Nwii tse' ŋàŋ fo' wo fa.

6 Yi à fa yà' lə bohòŋwè. Yà'a mvè'nè wo à còm yà' ndzənə ŋwàk Nwì də,

<<O Nwì, mo ñwèe yè'sə yu yà nè co wù sə tsərə
də wu kə tēsə yi ε?

⁷ Wù à fəsə lònàan ye fa' mañkwèn,
Nə ɣu yi yi jə'rə casə masinjàa Nwì wèn ɱənə
m̀vək momjo vε'ε.

M̀m̀vək nè jo ànə à cà fana wù ɣu fe'lə yi,
Yi yam co ñkum nè ghan nè bwiñ sə gèñ yi.

⁸ Wù ɣu yi də yi tse' ñan bə bum pwe' sè' yi nə.>>
Wo à còm vε'nə də Nwii ɣu ñwè ñgòtse' ñan bə
bum pwe' yi. A yà'sə də yumòk nè co də ñwè
ka nà' ghak ka mok cum fe'lə. Megu də vès ka
ɱga ñwè sə nitsè' nsàp ñan ènə ɱənə bum pwe'
m̀lìsè bwi ɱga'a ntòye.

⁹ Vès sə yə lε Jisòs nè yi tse' ñan ɱənə bum pwe'
co ñkum yi. Nwì ànə ɣu yi mantombi fa' ghàr
də yi jə'rə casə tson masinjàa Nwì wèn. Anə ye
vε'nə bə bònəm nè Nwì, də ya ɱga yi kpa njo tu
bwiñ. Fana Nwì à fa yi dzòk nè ghan nè co wo
wəp yi ènə b̀usè yi à yə ɱgə', nə kpa.

¹⁰ A ɣu bum pwe'fo' Nwì, yà' cu fo' yà'sə ñgògù
ya yi yəəñ ɱkùuñ. Fana yà' ànə ye kəkurè də
Nwì à ɣu Jisòs ñgòye kəkurè ma lònfo' bə nsàp
ɱgə' nè nà' à yə, ya bwiñ b̀uñ və bwe ye, nə
kə tse' bum sè bəbən sè bə bòn Nwì sə. Jisòs
nə ñwè nè mantombi yi nè ñgònitsè' fa bwi
mandzè lùñ.

¹¹ Yi Jisòs nè yi ɣugè bwi wo yəəñ rərəñ
mantombi Nwì, nə ye bə b̀u sè yi rəñsə figè
fa wo b̀p awo sə pwe'fo' tse' mègù tè' nè mò'fis.
Nà'a njo nè Jisòs nə togè wo də bwema, nə kà
marè'tu ñgòto yà'wèn vε'nə koksè nə.

¹² Ghà nəmòk à ye, Jisòs nə cep bohòNwì də,

<<O Nwì, mụ nẹ gu bwema am wèṅ, wo riṅ liṅ yo.

Mụ nẹ lokok təəṅ mvwe' kwe' bùu yo wèṅ,
Nẹ sẹ yəm geṅ liṅ yo sẹ.>>

¹³ Yi à cèp mòk sè' dẹ,

<<Mụ nẹ fa ntum àm bohòNwì.>>

Nẹ duk fe'lə mvək mòk sè' dẹ,

<<Wèṅ ye mụ nẹ', ves bwe sè Nwì a fa mụ.>>

¹⁴ Bwe ye sẹ wèṅ mègù sè' co bwiṅ, wo tse' bo bẹ kù sè'. Fana Jisòs bẹ tu ye vẹ ye sè' co wo, ya yi kpụ ṅgògù bupsə Satà. A vẹ'nẹ bùusè Satà nẹ ṅwè nẹ yi tse' ṅàṅ bẹ kpụ yi.

¹⁵ Njọ nẹ wo ànẹ sẹ wẹp kpụ fana ncu àwo megu co wo ṅkwèṅ vẹ'ε. Yi à vèə, yà' kẹ gu wo, wo swε'ε tesə mvwe' nsàp wuə ànẹ.

¹⁶ Yà' nọjəja dẹ yi ànẹ ka ṅgòkè tesə masinjàa Nwì wèṅ vẹ. Yi à vè dẹ yi kẹ tesə ṅgwì bù Abrahàm wèṅ.

¹⁷ Ye dẹ ànẹ ye kəkurè dẹ yi bùuṅ co bwema ye sẹ wèṅ bẹ nsàp mandzè nẹ fòlòṅ, ya yi ye co ṅkum ṅgà fa satikà' àwo ṅgòfàk bohòNwì bẹ zìnə, nẹ tse' koksèmanziṅ bohòbwi, ya yi kwes fis fa bwi fèṅ awo.

¹⁸ Aco yi tesə riṅ to bùu sè wo sẹ yə ṅgə' bẹ mèmumsè vẹ'nẹ, bùusè yi bẹ tu ye ànẹ ye to ṅgə' bẹ mèmumsè mantombi sè' vẹ'nẹ.

3

Jisòs Yam Gha' Musi

¹ Bwema am wèṅ, Nwì a to fis nònṣə wèṅ zok ṅgòye bùu ye. Ye dẹ wèṅ sẹ tsərə Jisòs nẹ a yi nẹ yi tẹ mvwe' kùu Nwì. Yi ṅgà fa satikà' nẹ

ghan bohòvès bə bum sè vesùwèŋ sə fa ntəm fo' sə.

² Nwì ànə cokfis yi yi də yi gū fàak yà'sə. Yi à sə gū fàak sè Nwì à fa yi sə fana yi gū yà' bə zìnə ye pwe'fo'. Yà' mègù sè' mvè'nè Musì ànə gū fàak ye bohòbùu Nwì wèŋ bə zìnə ye pwe'fo' yà'a.

³ Jisòs yam gha' Musì yi, sè' co mvè'nè ñwè nè yi a ci ndap yam gha' ndap nə yi yà'a.

⁴ Wu yə-a ŋga ndap tə, wù ri də à ci nà' ñwè. Yà' mègù sè' zìnə də bum sè vesùwèŋ sə yə yà' pwe'fo', à gū yà' Nwì.

⁵ A zìnə də Musì ànə gū fàak ye bohòbùu Nwì wèŋ bə zìnə, sè wo yà'sə co ndap Nwì nə. Yi à gū vè'nə ŋga yi mègù mofàk. Fàak ye sə à sə nìtsè' gèsə lo yà'sə bə sè wo nè kè cèp bə zèŋ mantombi.

⁶ Ma nè Jisòs Krest ye, yi à gū fàak ye bohòbùu Nwì wèŋ sə co mo Nwì nə nè mwe bə tu. Bum pwe' à ye ndzə bohòyi fana yi gū yà' bə zìnə ye pwe'. Vesùwèŋ yè'e sè' ndap ye nə, ŋga a ye-a də a sə naaŋ tu bə bum sè Nwì à kàk ves sə nə kà sə mərə na. Ŋga a sə kwa, nə sə tsərə də nùmbu ànə kə wəs tsoŋ.

Jəŋ Ñkərə Ya Wu Kà Mvwe' Ncum BohòNwì Bwə

⁷ Yòŋsè nè Rərəŋ nə sə cèp də,
<<A ye-a ŋga wèŋ yuk ŋì nè Nwì nə ntinə,

⁸ Wèŋ kà də wèŋ gūŋ ntəm duk.

Kà də wèŋ gūŋ tu mvè'nè bùu awèŋ ànə gūŋ
fa' ghà nè wo à sə gìhi ŋgəà,

Fana wo ɣɛɲ tu bohòNwì, nè mumsə ja'a yi yà'a duk.

⁹ Anə ɣɛɲ Nwì cep də,

<Tàcicii awèɲ ànə ɣɛɲ tu bohòmà,

Nə mumsə mə lùm mòk fa',

Ŋga wo à yə mè yusè mù ànə fak bohòwo mənə lùumɲgòɲ hum kwè ve'ε bèboɲni.

¹⁰ Nà'a njo nè ntəm à bɛp mə bohòwo ɲkuɲ mù cep də,

Wo ka ɲgògì sənə mandzè àm dzəm fana nè sə jam meɟu jamə. Wo à bèɲ ɲgòrìɲ mandzè nə.>

¹¹ Anə ɣɛɲ mù jok, nè keɲ də, wo nè kà ɲgòkè cu yòɲsə mvwe' yàm vè yuk.>>

¹² Bwema am wèɲ, wèɲ jəɲ ɲkərə ya kà də ɲwè nəmòk məɲgorè wèɲ kə tse' nsàp ntəm nè bɛp nè aco nà' ɣɛ yi, yi kà Nwì dzəm, nè me'rə mak mandzè Nwì nè yi cu fo' ɲwəm nə duk.

¹³ Yusè wèɲ sə ɣɛ sə lɛ də wèɲ sə tipsə bwìɲ ɲgòtse' ntəm nè ɲgòlòmantombì nùumbu pwe'. Wèɲ sə ɣɛ ve'nə ya ɲga lùum sè bɛp bòrəgè bwìɲ bə zeɲ yà'a kà weɲ bòrè. Yà'a bòrə-a weɲ fana wèɲ ɣɛɲ bɛp lo tu bohòNwì. Ye də wèɲ ɣɛ yè'sə niè' nè a tse' malì mvək mòk co ntìnə nè'e fo'.

¹⁴ Wèɲ riɲ də vesùwèɲ ɲga'a ves Jisòs wèɲ mvwe' mò'fis. Yè'sə zìnə ɲga a kotse'-a bum sè vesùwèɲ ànə yuk yà' mantombì yà'a cək tètè kə ləsə na.

¹⁵ Ncèp nə cu malì ndzənə ɲwàk Nwì də, <<A ye-a ɲga wèɲ yuk ɲgì nè Nwì nə ntìnə, Wèɲ kà də wèɲ ɣɛɲ ntəm duk.

Kà də wèŋ ɣɛŋ tu mɛvè'nè bùu awèŋ ànə ɣɛŋ
fa' ghà nè wo à sə ɣìhi ŋɔà

Fana wo ɣɛŋ tu bohòNwì yà'a duk.>>

¹⁶ Bùu sè wo ànə yuk, nə sə ɣɛŋ tu à ye ndà wèŋ?
Ka bùu sè Musì à kè fis vè wo mvwe' nzeŋgòn
Ijìp yà'a yeŋ nà?

¹⁷ Bùu sè wo ànə joksə yi ntəm mənə lùumŋgòn
hum kwè à ye ndà wèŋ? Ka bùu sè wo à ɣù bɔp
nə kpɛ, ni' awo nòŋ mam ŋɔà yà'a yeŋ nà?

¹⁸ Nə ye sè' də bùu sè yi ànə keŋ də wo nə kà
mvwe' ye ŋɔyòŋsə fo' kè ni yuk ndà wèŋ? Ka
bùu sè wo à ka duk ye yuk yeŋ nà?

¹⁹ Vesùwèŋ yə jəja də wo ànə ka fo' kə ni to njo
nè wo ànə ka tu bohòNwì naəŋ.

4

Məmvwe' Nè NgòCu Yòŋsə Fo'

¹ Nwì a kàk ves də anə lo kə cum yòŋsə mvwe'
ye. Ye də a bèbòŋ də a jəŋ ŋkərè də kà də ŋwè
nəmòok kə tesə mənɔgòrè vès nè də yi ka ye fo'
kə ni duk.

² Vesùwèŋ a yuk Ntirè Nwì nè nà'a bèbòŋ nə,
sè' mɛ mvè'nè wo ànə tsok fa tàcici avès wèŋ
ghà nè wo à ye ŋɔà yà'a sè'. Megu də vesùwèŋ
yə də ncèp nè wo ànə yuk nə à ka wo yumok
tesə. Nà' ànə ka wo tesə bùusè wo ànə yuk, wo
kà yà' sə ntɛù wo dzəm.

³ A nə ni fo', nə cum yòŋsə mvwe' ye sə
vesùwèŋ sè a dzəm ncèp nè nje nə sə ntɛù vès
sə. Nwì à cèp ma nè bùu sè wo à ka ncèp ye nə
dzəm də,

<<Ànə ɣeŋ mɛ jɔk, nə keŋ də

Wo nè kà ngòkè cu yòņsə mvwe' yàm vè yuk.>>
 A ka də mvwe' sè ngòcu yòņsə fo' ànə ye bùè
 yeņ. Busə yi ànə cep yè'sə nga yi gù wes mè
 nzenğònə laņ, nè yonșə yu ye.

⁴ Njo nè yà' cu mǝmvwe' mòk ndzənə ņwàk Nwì
 anə də, nùmbu nè sàmba à dzèeņ, nga Nwì gù
 wes fàak ye fana yi cum yonșə yuye.

⁵ Mvwe' sè ngòcu yòņsə sə ànə ye fo' yo vè'nə
 fana yi cep mali də, <<Wo nè kà mvwe' yàm sə
 kè cu yòņsə yuk.>>

⁶ A rì də mvwe' sè ngòkè cu yòņsə fo' sə cu yo.
 Nə riņ sè' də bùu sè wo ànə yuk nè kà sə ntùè
 wo dzəm, wo ànə ka fo' ni lo.

⁷ Fana Nwì a fa mali mǝmvək mòk səmok nè yi
 sə to nà' də ntinə, nà'a nga'a. Ye jəņ mvè'nə bùu
 yà'sə wèņ à ka fo' kə ni yà'sə fana, lùumņgòn
 ànə ca ma ņkwèņ anə wùriņ fana Nwì cep casə
 yumok cùhu Devìd. Yusə yi à cèp sə, a sè' ncèp
 nè wèņ a yuk nà' sè' laņ. Nà'a də,

<<A ye-a nga wèņ yuk ņgì nè Nwì nè ntinə,

Wèņ kà də wèeņ gəņ ntum duk.>>

⁸ A rì də mvwe' sè ngòyòņsə fo' nè yi à cep ènə
 ka nzenğònə Josùwà ànə jə lo bwe Izùre fo' nà'a
 yeņ. Busə ànə ye-na də a zeņ bwère də yi à ka
 maņkwèņ bə mvək nəmòk nè zok mok cep fe'lə.

⁹ Ncèp ye ènə sə nitsə' də bùu Nwì wèņ tse' li
 yèyòņsə mòk yo. Nà' mègù co nsàp nè Nwì ànə
 cum yonșə nùmbu nè sàmba nà'a.

¹⁰ Nwè nè yi cu yòņsə nsàp yèyòņsə ènə, yi
 mè'rə fàak ye pwe'fo', nè yonșə mvè'nə Nwì ànə
 yonșə ye.

11 Ye də a lə ɡuɡuŋ də ya a kə cum yonʂə məmʋwe' ànə. Kà də mook ye ŋgà ɡutu co tàcici avès wèŋ ànə ɡuŋ tu, nə kà kə dzèŋ yà'a dək.

12 A rì də ncèp nè Nwì cu ŋwəm nə tse' ŋàŋ ve'ɛ wù kà fàk. Nà' cəp càsə fèk nè nà' tse' ncəp ma ba. Nà'a lògè, nə kə ni dzeŋ haan mʋwe' sè ntum ŋwè bə yonʂə ye kə tes. Nà'a kə dzèŋgè mʋwe' ntək, nə casə vəp, nə lo ndzə tsətsə'rè anə. Nà'a lòve'nə, nà' kə fis və yusè ŋgèŋgàŋ sə tsərə bə yusè ntum ye sə fàk pwe'fo' mʋwe' jəja.

13 Yumok ka bohòNwì sèswihi yeŋ lok. Bum pwe'fo' nòmulisè yi jəja kwaranɡaŋ. Vesùwèeŋ nè kə təeŋ ntsə'mòk mantombii yi, nə sə tsok bə cùu avès yusè vès à ɡu.

Jisòs Yəyə̀rè NgòYe Nkum Ngà Fa Satikà' Avès Nè Ghan

14 Vesùwèeŋ kotse' bum sè a yuk yà', nə dzəm yà' sə cùk. A ɡu ve'nə njo nè a tse' ŋgà fa satikà' nè ghan nè yi tə mantombii Nwì bùu tu avès. Ngà fa satikà' ènə Jisòs nè yi mo Nwì, nè yi a lòmabu mʋwe' sè Nwì cu.

15 Ngà fa satikà' avès nə, yi ka ŋwè nè də a sə yə-a ŋgə', yi kà bə zeŋ rɛèŋ yeŋ. A ve'nə bùusè yi sè' co vès. Nsàp mèmumsè nè fòpwe'fo' à vè yuk bohòyi laŋ, megu də yi kà nè mò'fis gbè.

16 Ye də vesùwèeŋ nə və mʋwe' kapràak Nwì nè yi ŋgà bòvəm bohòbwì nə, nə kà wəp. Yà'a mʋwe' sè Nwii nə koksə manziŋ bohòvès, nə ɡu ves bèboŋ, nə tesə ves ghà nè à sə làp də ŋwèe tesə ves.

5

¹ A rì də wo cokfisgè ngà fa satikà' mən̄gorè b̄uə ye wèn̄. Wo n̄n̄səgè yi də nà'a təəŋ fa wo bohòNwì, nə sə fa satikà' nə ye fəfaa mok bohòNwì bə b̄əp awo sè wo ḡuə. ² Njò nè yi sè' ŋwè co vès, nə tse' sè' nsàp nt̄m nè aco nà' ḡu yi, yi ḡu b̄əp fana yi nə riŋ ŋgòkotse' b̄uə sè wo sə jam mandzè njò nè wo ka b̄əb̄oŋ kè b̄əp àlɛ riŋ.

³ M̄m̄vè'nè yi tse' nsàp nt̄m ànə fana nà'a njò nè yi tse' ŋgòfa satikà' bə tu sè ye sè' m̄vè'nè yi sə fa bə tu b̄uə mok wèn̄ sə.

⁴ Yumòk nè vès rì nà'a sè' də, kaco ŋwè tsərə kok megu sə nt̄uə yi, nə duk də yi b̄uəŋ ngà fa satikà' ya bwìiŋ jəŋ yi co ŋwè nè ghaŋ yeŋ. N̄wèe b̄uəŋgè ngà fa satikà' ŋa Nwì to yi yi, m̄vè'nè yi ànə to Aròŋ lùm mòk fa' yà'a.

⁵ Krest à ye sè' nsàp ŋwè ànə. Yi ànə ka ni' ye yi, də yi ye ngà fa satikà' koksə. Nwì à cokfis yi yi. Yi nè yi ànə duk fa Krest nə də,
<<Wu yè'e mo àm. Ye jəŋ ntinə nə lo mantombi, m̄ ye tè' yònə.>>

⁶ Yi à duk fe'lə fa nà' m̄wə' mok sè' də,
<<M̄ koksə wu ngà fa satikà' nè m̄vèsè, kè' mò'fis,

nsàp nè M̄acisidèk à ye nà'a.>>

⁷ Ghà nè Jisòs à cu malì m̄ nzen̄gòn̄ fɛɛŋ fo' fana yi ləŋ p̄iriyà mòk bohòNwì nè yi tse' ŋàaŋ sè aco yi fis to Jisòs nə m̄wə' kp̄u nə. Yi ləŋ torə fis p̄iriyà ènə bə ŋàŋ, nə sə waŋ bə ndzəplis. Anə geŋ Nwì yuk yi b̄uəsè yi ànə jəŋ lo ni' ye sə nze bohònà' anə.

⁸ Yi ànə ye mo Nwì sè yo, yi yə'rə riŋ wesə mali mandzè nè ɲgòyuk dək Nwì bə nsàp ɲgə' nè yi ànə ye maŋkwèŋ.

⁹ Nwì ànə ɣu wes yi də nà'a ye kəkurè ma lònŋfo' vɛ'nə fana Jisòs nə à ye mok ɲwè nè ndaanwè pwe' nè nà' yuk-a dək ye, yi tse' lùŋ fo'.

¹⁰ Anə ɣeŋ Nwì fa yi nsàp ɲàŋ nè ɲgòye ɲà fa satikà' nsàp nè Màcisidèk à ye nà'a.

*BòŋgòKùu', Nə Zɛ Bɛŋ Sə Bɛŋ
Bwèrɛ Jə'rə Ko Wu*

¹¹ Vès tse' bum wùriŋ ɲgòtsə' fa wɛŋ bə nzak ɲà fa satikà' ènə. Megu də a ɣuɣuŋ ɲgòtsə' fa wɛŋ bəusè wo tsə'gè wɛŋ yumok, wèŋ kà bə zɛŋ ntəntəŋ rɛɛŋ tohò.

¹² Vès sə kwà' yàvès də anə ye co ɲga'a ɲga wèŋ sə yə'rə fa bəu mok wèŋ bum sè ma nè Nwì. Yà' sə yəəŋ bwì fe'lə də wèŋ cu mali co ɲwè nəmòk kə yə'rə fa fe'lə wɛŋ bwe bum sè wo yə'rə yètogè yà' ma nè Nwì anə ntòyèto yà'a. Anə ye co wèŋ sə zɛ ɲga'a bɛŋ sè bɛŋ co bəu sè wo ɣu vəp laŋ. Wèŋ nə sə nòmali nə ntòmbwi. Nè'e nsàp nè fòvɛ'nə-ɛ?

¹³ ɲwè nè yi nogè ye mbwi, ye də ɲgèŋgàaŋ molə. Yi ka yusè wo sə yə'rə bə mandzè nè kəkurè nə ntòriŋ.

¹⁴ ɲwè nè yi zɛgè ye bɛŋ sè bɛŋ, a ɲwè nè aco yi tsərə to bə tu ye. Yi a yə'rə, nə riŋ ɲgògəpsə rì bəp bə bəbɔŋ laŋ.

6

¹ Nə yeè nə vɛ'nə fana a bəbɔŋ də a lo lɛ mantombì ɲgòyə'rə bum sè ɣuɣuŋ ma nè Krest

nə co bùu sè gugun wèŋ. Kà də a cum mam mali bə bum sè jəjəp sè wo a yə'rə to fa ves yà'a duk. A kà də a sə yə'rə yiskok megu nè də, bwiin bwi fa bup awo ŋkwèŋ nè aco nà' jəŋ və fa wo kpə, nə dzəmtse' bohòNwì nà'a mok sè duhù.

² Vesùwèŋ a yə'rə rì wes bə nzak bəpte nə ye bə nzak nè ŋgònaaŋ fa ŋwè bo mətuhù wèŋ laŋ. A yə'rə mok sè' də bwiin nè kè lòkok mvwe' kpə, nə riŋ mvè'nè wo nè kè sak lèsə nzak nùu sə.

³ Vesùwèŋ a yə'rə rì wes bum yà'sə pwe' laŋ, Nwìi tesə-a fana a lo mok mantombi.

⁴ A tse' ŋgòlòmantombi bùusè mandzèə bùè nè co wù gu ya bùu sè wo a riŋ bum yè'sə nə kə foho dzeen fe'lə yà' yà'a foho vè sèmok. Nsàp bù ènə ànə ye to me mareŋ nè Nwì nə, nə riŋ bèbo nè Nwì nə sè'. Wo à tse' yuk mè Yòŋsè nè Rəreŋ nə yàwo sè' laŋ.

⁵ Wo à mùm ja'a, nə riŋ də ncèp nè Nwì nə nà'a bèboŋ. Wo à mùm ja'a ŋàaŋ sè yà' cu bə nzeŋgòmòk nè nà'a nè kè vè ntsə'mòk nə sè'.

⁶ A ye-a ŋga bùu sè wo à rì bum yè'sə pwe', kè foho dzèen fe'lə yà' sè' wo sə, ye də mandzè nè ŋgòfəsə vè wo bùè. Busè anə ye co wo sə te'lə fe'lə mo Nwì muntəəŋ nè kè' ba, nə sə fa-à nə yi marè'tu mətsetsə'rəə bwìŋ.

⁷ Mvwe' nze nè mbùuŋ ligè fo' bèboŋ, zuzu sə tesə bohòbùu sè wo sə fàk nà' sə fana Nwì gù boŋsə mvwe' nze ànə.

⁸ A ye-a də ŋgaŋ sè bup sə kùk mègù mvwe' yà'sə wo, fana ye də nze nə ka fàk tse'. Nwì kùəp ŋgòyàk mùm mvwe' ànə. Wo nə və kə təŋ vəpsə bupsə mùm mvwe' ànə fo' wà.

Wèeη Təəη Gʊgʊη Ma Nè Nwì

⁹ Nge' am wèη, vès sə cèp-a sè vɛ'nə fana ηga vès rì wèη yàwèη riì. Vès rì də wèη sə yù mandzè nè bəboη nə tse'è nə lùη fo'.

¹⁰ Nwìi gùgè bum ye bə mandzè nè nà'a zìnə. Kaco yi nə swi fàak sè wèη à gù yà' yeη. Mvè'nə wèη à tesə bùu ye wèη, nə sə tesə mali nə ηga'a yè'e, yi nə kà yà' sè' swì. Bum sè wèη sə gù yà'sə pwe' sə nìtsè' də wèη dzəm yi.

¹¹ Yusə yà' cu sə ntɔù vées də wèη pwe'fo' wèeη jihì nzòη, nə təəη gʊgʊη tè kə ləsə. Wèeη gʊ vɛ'nə ya wèeη nə kə tse' bum sè wèη sə naan tu də wèeη nè kə tse' sə.

¹² Kà də ηwèe koksə wɛ' duk. Wèeη bɛ' lɛ kùu bùu sè wo sə dzəm mandzè nè zìnə nə yà'a, nə sə təəη gʊgʊη. Nà'a nsàp bù nè wo nè kə tse' bum sè Nwì a kàk wo sə.

Nwìi Kà Bwì Bòrəgə

¹³ Mvè'nə Nwì ànə sə kak fa Abràham yumok fana yi à kèη bə liη sè ye, ηgònìtsè' də yi nə gʊ tsoη li yusə yi kàk nà' sə. Yi ànə kèη bə liη ye vɛ'nə busə ηwè nəmòk nè nà' càsə fe'lə yi co yi kèη bə liη nà' à ye bùè.

¹⁴ Nwì ànə kak fa Abràham nə də, <<Gʊ kpʊ tsoη yà, mʊ nə se wu, Abràham. Mʊ nə gʊ ηgwì bù yòyam vɛ'ɛ sè' wùriη.>>

¹⁵ Ànə gèη Abràham ko ntəm, nə təəη gʊgʊη tətè yi à kə tse' yusə Nwì à kàk yi sə.

¹⁶ A rì də ηwèe kèηgè kèη, yi kèη bə liη ηwè nəmòk nè nà' yam càsə yi. Bwìη kèηgè kèη vɛ'nə fana ye də nzak mèe.

¹⁷ Ye də Nwì ànə dzəm ɲgònì fa bùu sè yi ànə kak yà'wèŋ yumok sə wèŋ də yi nə kà cùu ye kupsə yuk. Fana yi keŋ bə liŋ ye ɲgònìtsə' də yi nə ɣu yusè yi dək sə.

¹⁸ Kəkà' nə ye ɲgòkèeŋ yà'sə bum sè ba sè kaco mòk kupsə yeŋ, Nwì ka mɔwès bə zeŋ sè' ci' yuk. Bum sè ba yà'sə ɣùgè vès sè a ca təhə tu avès bohòNwì sə ɲgòko ntum, nə sə naaŋ tu ɲgòkè tse' yusè Nwì à kàk də a nè kè tse' ntsə'mòk sə.

¹⁹ Kaco ntuum avès saha yeŋ bùusè a rì də Nwìi kəgè yumok, yà' kà wà cà. Naaŋ tu nè a tse' bə bum sè Nwì a kàk ves yè'sə ɣùgè ves fana vès neŋ tosə ndaa sè ɲgòni lòmɔwe' dzoŋ sè rəreŋ sè mɔ ndap Nwì nè ɣaŋ sə.

²⁰ A vɛ'nə bùusè Jisòs bə tu ye a kè niŋ to fa ves fo' yi. Jisòs nə yi ɲgà fa satikà' nè ɣaŋ, nsàp nè Màcisidèk à ye nà'a.

7

Màcisidèk Ɗgà Fa Satikà' Nè Yi Ghak Aròŋ

¹ Ɗwè nè wo to liŋ ye də Màcisidèk ènə à ye ɲkum mɔwe' lak mok sè wo to fo' də Salèm. Yi à ye sè' ɲgà fa satikà' Nwì, yi Nwì nè yi yam càsə pwe' nə. Mvèk nəmòk à ye Abràham lo mɔwe' mà' dzè' nə kə zə bù ɲkəŋkum mok. Yi ànə sə bwi foho və fo' fana Màcisidèk nə kə tseŋ yi mandzè, nə se yi.

² Yi ànə kə tseŋ Abràham nə vɛ'nə fana Abràham nə ɣapsə bum sè yi jə vè mɔwe' dzè' sə pwe' bòp hum, nə fa nà' bòp mò'fis. Liŋ Màcisidèk nə yà'sə də, Ɗkum nè yi ɣùgè bum

kèkurè. Liŋ ye mook sè' dè, Nkum Salèm. A yà'sə dè, Nkum ngà fifi.

³ Nwè nəmòk ka ngwì bù ye riŋ lok. Wo ka ghà nè wo à dzə yi kè ghà nè yi anə kpə sè' riŋ. Yi ye yà'sə co mùmchè'nè mo Nwì cu, bùusè yi mam ye ngà fa satikà' nè mvèsè.

⁴ Ye-na yònsàp nwè nè Màcisidèk yam è. Abràham nè yi à ye tè', nè yi à yèto ngwì bù Izùre yi nè à gəpsə bum sè yi à fès jə vè mvwe' dzè' sə bòp hum, nè fa Màcisidèk nè bòp mò'fis.

⁵ Lùk Musi sè tsè' dè bwe Izùre pwe' nè gəpsə bum awo sè wo tse' sə bòp hum, nè cokfis nonşə bòp mò'fis ca. Wo cokfis ve'nə, wo fa yà' bohòngàa fa satikà' sè wo tesə mùmvwè' ndap Levì. A rì dè ngàa fa satikà' yè'sə wèŋ à sè tse' bum yè'sə nga sə fa wo yà' bwema awo sè wo pwe' ngwì bù Abràham.

⁶ Nè Màcisidèk nè ye zok. Yi à ka nwèè Levì sè yeŋ, fana Abràham fa mali yi bòp nè mò'fis nè. Anə geŋ yi se Abràham nè sè', Abràham nè Nwì à nè zə rùk bə nà' nè.

⁷ A riŋ jəja dè nwè nè yi sègè mòk, ye dè yi yam càsə nwè nè yi sè nà' nè yi.

⁸ Bwe Levì sè wo à sə jə bòp nè mò'fis sənə sè hum yè'sə wèŋ à ye bùu sè wo kpugəə. Nwàk Nwì sè tsè' dè Màcisidèk nè yi à jə ye nè, cu fo' nwəm.

⁹ Mchè'nè Abràham ànə jəŋ bum yè'sə, nè kə fa Màcisidèk yè'sə fana aco a duk dè, à fa Màcisidèk nè yà' Levì, yi nè bwe ye wèŋ sə jə nsàap bum yà'sə niè' wo sə.

¹⁰ Aco a duk ve'nə bùusè ghà nè Abràham à kè

fa Màcisidèk nè bum yè'sə, à ye nga yi ka tàcicii Levì nè ntòdzə.

¹¹ A cep-a bə fàak ngàa fa satikà' sè wo à ye bwe Levì sə. Nwì ànə fa bwe Izùre wèŋ lùuk Musì fana yà' à ye bə nsàp mandzə nè ngàa fa satikà' sè wo à ye bwe Levì à sə gù fàak awo. A ye-a də fàak sè ngàa fa satikà'a yè'sə wèŋ à sə gù sə à ye kəkùrə ya bwìiŋ ye jì njo mantombii Nwì, bwère njo mòk à ka yeŋ nè də ngà fa satikà' mòk və fe'lə sèmok. Ngà fa satikà' nè wo də yi ye nsàp nè co Màcisidèk à ye nə, yi kà mok nsàp nè Aròŋ ye fe'lə.

¹² A zìnə də a ye-a nga ngà fa satikà' mòk və nè nsàp mandzə nje zok fana lùuk nè kupsə tson yàwo sè'.

¹³ Tà Jisòs àvès nè a sə cèp bə liŋ ye nè'nə, yi a tesə və ye bə bòp lak nè zok. Ngà fa satikà' nè mò'fis à ka mvwe' bòp lak ànə tesə yuk.

¹⁴ A rì bəbòŋ làaŋ də Tà àvès ngwì bù Judà. Ghà nè Musì à sə cèp bə mandzə ngàa fa satikà' wèŋ, yi à ka lak yà'sə fə ntu'ù n̄wè nè mò'fis tèn yuk.

Jisòs Ngà Fa Satikà' Mòk Co Màcisidèk

¹⁵ Bə nzak ngàa fa satikà' wèŋ fana a rɛɛŋ bòn̄sə gha' fe'lə bə zɛŋ bùsə ngà fa satikà' mòk a tesə və nè yi co Màcisidèk. Jisòs ngà fa satikà' mòk co Màcisidèk.

¹⁶ Yi ànə ye ngà fa satikà' ka də a mvè'nè lùk sə dzəm də wo jəŋ yi yeŋ. Yi ngà fa satikà' bùsə yi tse' n̄aŋ sè ngòfa n̄wè lùŋ nè ka co nà' me yuk yeŋ.

17 Vès riŋ yè'sə bùusè yà' cu ndzənə ŋwàk Nwi də,

<<Wù, wu nə ye ŋà fa satikà', nsàp nè Màcisidèk à ye nà'a nè mvèsè.>>

18 Vès sə yə də lùk nè nà' à ye mantombi à kupsə bùusè nà' ànə ka ŋàŋ tse' nə kà fàk bohòbwiŋ sè' tse'.

19 Yà'a lùuk Musi yà'sə ànə kaco yà' ɣu ŋwè yi ye kəkərè mu lisə Nwi yeŋ. Nwi a jə vè yumòk nè bògha' ɛ zeŋ. Fana a yə də lùk mòk nè nà' bòghak ɛ zeŋ sə vèə. Nà' sə vèə ŋgòfa ves naəŋ tu nè bèboŋ, nè aco nà' ɣu ves a kəəp və ŋu ni' yi.

20 Yu nəmòok sè' də, ghà nè Nwi ànə duk də Jisòos nè ye ŋà fa satikà' nè mvèsè fana yi kəŋ be'lə bə kèŋ. Ghà nè ŋgwì bù Levi wèŋ ànə sə kok gaŋ ŋàa fa satikà' yà'sə fana ŋwè nəmòk à sə kà kèŋ fo' kèŋgè.

21 Ma nè Jisòos ye də ghà nè Tà Nwi à koksə yi ŋà fa satikà' fana yi kəŋ bə kèŋ. Tà Nwi à kèŋ də,

<<Wu nə ye ŋà fa satikà' nè mvèsè.

Yusè mù cèp yè'e nə kà kè kupsè yuk.>>

22 Njo kèŋ nè Nwi à kèŋ nè'nə fana Jisòs tə bohòvesùwèŋ co ŋwè nəmòk nè a yə yi, a sə riŋ tse' də rùk nè a zu nà' ves Nwi wèŋ nə, nà'a ɣuɣuŋ zìnə.

23 Yu nəmòok sè' də, ŋàa fa satikà' sè wo à ye ŋgwì bwe Levi wèŋ sə ànə ye yàwo wùriŋ bùusè mòok kpu, mòk kok.

24 Nè Jisòos ye zok. Yi nè kà ye kpɔ yuk. Nwè nèmòk nè zook nè kà mvwe' ye sɛ co ngà fa satikà' mòk kè cu yuk.

25 Nà'a njo nè yi tse' nàŋ pwe' nè pwe' ngòfa lùŋ bohòŋwè nè yi cà-a bohòyi ngòvè bohòNwì. Yè'sɛ vɛ'nə bùusè yi cu fo' ghà yà lòŋ, nè sɛ lɛŋ pìriyà mütuhù vesùwèŋ bohòNwì.

26 Ye dɛ Jisòos nè ngà fa satikà' nè yi kùrə bohòvès vɛ'ɛ kap. A vɛ'nə bùusè yi rəɛŋ, yi ka bɔp tse', nè kà jòn sè' tse' lok. Yi ye zok bohòŋgàa gù bɔp wèŋ, yi ye mabu səsapni.

27 Ngàa fa satikà'a mok yà'a wèŋ à sɛ fàha satikà' nùumbu pwe', nùumbu pwe'. Wo à sɛ fa to satikà' bɛ bɔp sè yàwo bɛ tu awo ŋkuŋ nè sɛ fa sè bùu bɔp sè bùu mok wèŋ. BohòJisòos ye, yi à sɛ kà nsàp satikà' anə fa bùusè yi ànə fa satikà' nje kè' mò'fis nà' kùrə vɛ'nə nè mvèsè. Satikà' ènə, a nè yi à fa ni' ye bohòNwì, nè kpɔ nà'a.

28 Bohòlùuk Musì, bùu sè bwìŋ, sè wo tse' jòn ànə sɛ ye ngàa fa satikà' wo. Bɛ nza' kèŋ nè Nwì à kèŋ, nè nà'a jə mvwe' kùu lùuk Musì sɛ fana Nwì a koksə mok mo ye nè yi kəkùrə nè mvèsè.

8

Jisòos Ngà Fa Satikà' Avès Nè Bə Rùk Nè Fi

1 Yusè vès sɛ cèp sɛ dɛ, a tse' nsàp ngà fa satikà' nè ghaŋ ànə nè yi tɛ bɛ tu avès. Yi cu bo ma mà'a Nwì nè yi maŋgəŋgèŋ nè yi sɛ sak ŋkum mabu nə.

² A yi nè yi tɔ fa bwɪŋ mɛ nda'à Nwì mvwe' nè rɔrɛŋ nà'a. A fo' mvwe' sè zìnə sè à gù Tà Nwì, ka ŋwè yeŋ.

³ Fàak sè ŋgàa fa satikà' wèeŋ gùgəə də, wo sə faha nsàap satikà' zəzok bohòNwì. Ye də a kəkərè də ŋgà fa satikà' nè yi tɔ mvwe' tu avès nɔ fa Nwì ye sè'.

⁴ Yumòok sè' də, yi ànə sə cum-a sə nze fɛɛŋ, yi kà ŋgà fa satikà' ye, bùusè ŋgàa fa satikà' wèŋ cu fɛnə yo, sè wo sə gù yàwo mvè'nè lùək Musi sə dzəm sə.

⁵ Fàak sè ŋgàa fa satikà' sə wèŋ sə gù sə, yà' mègù yà'sə co tsətsɛŋ wà. Yusè zìnə sə, a yusè wo sə gù yà' mɛbu. Tàap sè wo à gù yà' bə nsàp cək mòk nè ŋgòkùksə Nwì mbwa nà'a mègù sè' tsətsɛŋ. Nà' sə nìtsè' mvè'nè mvwe' sè wo kùksəgə Nwì cu mɛbu. Nà'a njo nè Nwì ànə cep bohòMusi ghà nè yi ànə də yi gɛ ndap nɔ də, <<Jəŋ ŋkərè də bum pwe' ye megu mɛmvè'nè mɛ a tsè' fa wu mɛmvwe' nda Sinà yà'a.>>

⁶ A ŋgà'a də a yə də Nwì a fa Jisòs Krɛst fàk sè yà' yam càsə fàak ŋgàa fa satikà'a mok wèŋ sə. Nə ye sè' də rùk nè yi sə càsə fa ves nà' nè bògha' sè' zɛŋ, bùusè Nwì a kàk ves bum sè yà' bògha' sè mantombi sè' bùu zɛŋ.

⁷ Rùk nè wo à zɛ to nà' mantombi nɔ ànə ye-na kùkərè ŋgòtɛsə bwɪŋ bwèrɛ Nwì à ka nè ba mok jəŋ və.

⁸ A yə də Nwì à yə də bùu ye wèŋ à ka nà' nonşə bùusè yi ànə duk də, <<Mvèk sə vəə nè mɛ nɔ zɛ rùk nè fi ves bùu Izùrɛ nɔ ye bùu Judà wèŋ.

Sə cəp vɛ'nə Tà Nwì.

⁹ Nè'nə nə kà mok co rùk nè mù à zɹ nà' ves
tàciciì awo wèŋ,

Ghà nè mù ànə kotse' wo bə bo am,

Nə fis wo mvwe' nzeŋgòljìp nà'a mok ye.

Wo à ka rùk nè vesiwèŋ à zɹ nə noŋsə.

Fana mù bwì fa wo ŋkwèŋ, nə co'krə fis bo am
bohòwo.

Sə cəp vɛ'nə Tà Nwì.

¹⁰ Rùk nè mù Tà nè mù sə cəp nə nə zɹ nà' ves
bùu Izùre wèŋ nə vɛ':

Nùmbu ànə kè dzèŋ nùu,

Mù gɹ ya lùuk am ni sə ntɹù wo,

Fana wo sə tsərə megu mok zeŋ nùumbu pwe'.

Mɹ nə ye Nwì àwo, wo ye bùu am.

Sə cəp vɛ'nə Tà Nwì.

¹¹ Njò mòok nə kà ye nè co wo sə kə duk ŋwə
mòk kè moma awo àle də,

<A bèboŋ də wu riŋ Tà Nwì> mok ye,

Busè wo pwe'fo', nè ŋkwà'ŋwè bə nè mweŋke'
pwe',

Wo rì mɹ.

¹² Anə ye vɛ'nə bùusè mɹ nə koksə manziŋ
bohòwo bə bum sè bɹp sè wo à gù pwe'.

Mɹ nə swi bisə bɹp awo sə sè'.>>

¹³ Mvè'nə Nwì cèep, nə to liŋ rùk nè fi fana ye
də rùk nè mantombi nə rèŋ bɹp laŋ. A riŋ də a
ye-a ŋga yumok rèŋ laŋ, nà'a nə bisə wà.

9

*Satikà' Nè Jisòs Nə,
Casə Yà Lòoŋ*

1 Rùk nè wo à zù to mantombi nè, nà' à tse' lùuk sè ngònì fa bwìŋ mvè'nè wo tse' ngòkùksè Nwì. Mvwe' mok à ye sè wo ànə gũ nonşə də ya bwìŋ nè sə kə kùksə Nwì fo'.

2-3 Mùmuvwe' nè wo à sə gùm dzòon fo' bə cèk ènə, ànə ye mvwe' sè wo à sə to fo' də Tàbanikè. Wo à sə fa satikà' mbwa. Wo à sə gùm dzòon nà' pwe', wo kə ci mündap mòk mbwa nè rum ba. Wo à kə'ə lok ncùu rum nè mà mbwèndap nè bə cèk. Wo to fo' də mvwe' sè yà' rɛŋ càsə. Bum sè wo à nèmsə mvwe' rum nè mò'fis nè à ye laàm bə teberə nè ye brəd nè wo à nonşə ngòkùksə Nwì fo'. Wo à sə to rum nè bum yè'sə fo' nè də mvwe' sè rərəŋ sə. 4 Kàm nè wo à sə tèn rəmsəgè bum fo' ngòkùksə Nwì bə zɛŋ à ye sè' mùmuvwe' nè nà' rɛŋ càsə ènə. Wo à gù nà', nè yok laŋsə wes nà' bə guù pwe'fo'. Nkùp nè nà' tə bə tu rùk nè Nwì à zù bə bùu Izùre wèŋ nè à ye fo'. Wo à yok nkùp ànə sè' bə guù. Wo à nonşə nsàp bɛŋ nè də manà nà'a sè' sənə nkùp nà'nə. Wo à gèsə yà' sənə to'kùŋ mòk nè wo à gù nà' sè' bə guù. Ntumbàŋ Aròn nè nà' à to mvù nà'a à ye sè' ca. Yusè yà' ànə ye ləsə ca à ye lis ba sè Nwì ànə com naaŋ lùuk ye mbwa.

5 Yumok à ye mu tu nkùp anə ba. Wo sə to yà' də ceròbim. Mòk cum ngũ nkùp ma mòk, mòk cum ma mòk. Wo saŋ və bàap awo kə be'lə mʉtsətsə'rè mvwe' bù'rè nè Nwì swisə fagè bwìŋ bup awo fo'. Yà' ànə ye fo' ngònitsè' fa bwì də Nwì fa'nə. A nè kà bum yà'sə ŋga'a pwe'fo' cèp rɛŋsè wes.

6 Mvè'nè wo ànə gũhũ tsə'rə wes mùmuvwe'

ànə fana, ηgàa fa satikà' wèη sə ni mʉmʉwve' ndap nə nùumbu pwe'. Wo sə ni mvwe' rum nè kè ncùhu ηgògù fàha awo fo'.

⁷ A sə ni mègù mvwe' rum nè màmbwè ndap nə ηkum ηgàa fa satikà' nə yìyi. Yi à sə ni mègù mbàa nùumbu nè mò'fis sənə lùmηgòη. Mvèk ànə ye, yi lo mbàa bə ndʉəm nàm ηgòkè mis fa Nwì njo bʉp ye sè yi a gù yi bə tu ye. Yi kə mis fe'lə mok sè' bə bʉp sè bʉu Nwì wèη a gùu ηga wo ka riη sè'.

⁸ Mʉmʉvè'nə à ye, fana Yòηsè nè Rəreη nə jə bum yè'sə ηgòyərə fa vesùwèη də, a ye-a ηga ndap Nwì tə mali fo' vɛ'nə, ηwè kà mvwe' rum nè reη càsə, nè Nwì fo' ànə kə ni lòyuk.

⁹ Nà'nə yà'sə nsàp yumòk nè nà' sə nìtsə' fa vesùwèη mvè'nə bum sè niè' sə cu. Yà' sə ni fa ves də kaco satikà' nè ηwè fa bohòNwì gʉ də yi riη də yi rəreη yeη.

¹⁰ Bum sè ηgòkuksə Nwì fo' yè'sə yà' mègù bum sè a yəgè yà' bə lis yè'e. Yà' mègù bum sè co beη bə nəno nə ye mandzè nè ηgòcùhu reηsə ni'. Yà'sə bum sè ηgògù ηwè ηgòyəəη rəreη mʉlisè Nwì. Bum nzeηgòη yè'sə ànə tse' fàak mvèk momjo wà kə dzeη ghà nè Nwì à kupsə bum mok bə mandzè nè fi.

¹¹ Nè ηgà'a nè'e Krɛst a vè laη. Yi ηgà fa satikà' bə nsàp mandzè nè fi nè nà'a jəη və bum sè bəboη. Yi gùgè fàak ye mvwe' Tàbanikè nè nà' yam gha', nə boη ghak nè sə nze fɛeη nè'e. Wo à ka mʉmʉwve' ànə bə bo ηwè gʉ, nà' kà ma sə nze sè' ye.

¹² Ghà nè Krɛst à kè cà ni lòmvwe' sè yà' reη

càsə sə fana yi ànə ni megu fo' kè' mò'fis, nə lə təəŋ vɛ'nə. Yi ànə ni fo' bə nduəm sè ye. Anə ka bə nduəm mbòŋ kè ndzə àlɛ yeŋ. Yi à jə nduəm ye sə, nə kə fiŋ me'rə fis ves bə zəŋ mvwe' ŋgə' nè vès à tse' njo bup sè vès à gũu sə mok mvèsə.

¹³ Wo à cì bwìŋ bə nduəm mbòŋ bə ndzə, nə kɛ' wo bə və mombòŋ nè wo tɛŋ vəpsə muni'i, ya ŋgùupni' awo yəəŋ mɔlisə Nwi rərəŋ.

¹⁴ A ye-a də nduəm nàm tse' ŋgòrɛŋsə bwì nsàp ànə, ye də aco nduəm sè Krest rɛŋsə ntum ŋwè nə casə yà lòŋ. Yi à jə ni' ye nè nà' ka bup tse', nə fa nà' co satikà' mətuhù vès. Yi à gũ vɛ'nə bə ŋàaŋ Yòŋsə Nwi nè yi kà mè yukgə nə. Nduəm ye yà'sə gùgè ntuum avès ŋgòye rərəŋ. Ya a kà bup sè co yà' jəŋ və fa ves kpɔ sə gùhù mali, vesùwèŋ sə be' lɛ mandzə Nwi nè yi cu ŋwəm nə.

Kpɔ Nè Jisòs Nə A Fa Yi Nàŋ NjòGù Rùk Nè Fi

¹⁵ Nə yeè nə vɛ'nə fana Krest nə tə mɔtsətsə'rəò bwìŋ bə Nwi yi njo kpɔ ye nè yi à kpɔ nə. Yi sə gùhɔ tsə'rə rùk nè fi ya ŋga bùu sè Nwi ànə cokfis wo ŋgòye bùu ye sə wèeŋ nə kə tse' bum sè Nwi à kàk wo sə. Wo tse' yà', wo tse' yà' mok nè mvèsə kè' mò'fis. Kpɔ ye nə fiŋ me'rə bwìŋ mvwe' ŋgə' nè wo tse' njo bup sè wo ànə gɔ, ghà nè rùk nè zəm nə ànə tse' mali ŋàŋ ntòfo' nà'a.

¹⁶ Ta kpɔ co wo zɔ rùk. Nwèè tagè kpɔ fana tse'ŋga yi kpɔ ŋkuŋ wo gɔ yusè yi à cèp nòŋsə lòsə.

17 Ghà nè yi cu-a ntòfo' fana kpɔ nè yi ta nè nè kà fàk tse'.

18 Nà'a njo nè rùk nè Nwì ànə zu to bə bwìŋ wèŋ mantombì nè à tse' ñàŋ ñga nduəm à ye fo' sè' ñkuŋ.

19 Ghà nè Musì à tsè' fa bwìŋ lùuk sè Nwì à fa də wo nè sə be' zeŋ sə fana yi tsoho wes fa yà'wèŋ, nè jəŋ mvùu ñgaŋ mok nè wo to nà' də hisòp, nè be'lə nà' bə ndàp nè bəbaŋ, nè gesə yà' sənə nduəm mombòŋ sè yi tòrə yà' bə ndzəp, nè mis ñwàk rùk nè fo'. Yi mis wes ñwàk nè, yi jəŋ yà', nè mis fa bùu sè wo fo' sə pwe'fo'.

20 Yi ànə mis wes fa yà' ve'nə fana yi sə kəa də, <<Yè'e nduəm sè yà'a ñgòkì ñge' ndzənə rùk nè Nwì a duk də wèŋ noŋsə nà'.>>

21 Fana Musì nè jə nduəm sə, nè mis tàbanikè nè, nè ye bum sè wo kùksəgè Nwì bə zeŋ sə sè' pwe'.

22 A zìnə də mandzè nè lùuk Musì à ye də, à ye ñga wo dzəm-a də wo gɔ yumok ya yà'a ye rərəŋ fana tse'ña nduəm kə dzeŋ tsoŋ lì fo' ñkuŋ. Bum sè wo à sə gùgè jì nduəm à ye mègù momjo. Fana mandzè nè aco wo swifa ñwè bɔp yè'sə bùè, tse'ña nduəm cuəm sə nze.

23 Anə ye to mantombì anə kəkùrè də wo gɔ ve'nə ya wo gɔ bum sè yà' à ye co tsətsèŋ ñgònitsè' bum sè yà'a ma mɔbu yà'sə ye rərəŋ. Nə ye fe'lə sè' də, a bəboŋ ñgòfa satikà' nè nà' bògha' zeŋ mɔ tùhù bum sè yà'a nsàp nè ma mɔbu nè, nè noŋsə satikà' nè bə nàm wà.

24 Nğàa fa satikà' mok yà'a à ni lòyàwo mɔmvwe' ndap nè ànə gɔ nà' bo bwìŋ. Yè'sə à

ye mègù co tsètsèn wà ngònitsè' mvè'nè mvwe' sè Nwii cugèə cu. Krèst à ni lòye mvwe' sè Nwì cu mabu anə bə tu. Yi tə mantombii Nwì anə bùu tu avès.

²⁵ Yumòok sè' də, nkum ngàa fa satikà' bùu Jus wèŋ nə à sə nigè mà mvwe' rum ndap tàbanikè nə luum ngòŋ bə luumngòŋ pwe'. Yi à sə nigè ye sə, kà bə nduəm ye sè ndzə ni'ì yi ye. Jisòs à ni ye kè' mò'fis, nə fa Nwì ni' ye sè' kè' mò'fis anə.

²⁶ Anə ye-a də yi tse' ngòni càsə kè' mò'fis də bwèrɛ yi à yə ngə' kè' nkùuŋ, ye jəŋ mvè'nè wo à gù nzenngònə sə. Yusə à ye də, yi à vè sə nzenngòŋ kè' mò'fis me vè'nə. Yi à vè yè'sə bə mvək njàvès nè niè' nè nzenngòŋ nə sə kəəp ngòmè nè'e. Yi à vəə, nə fa ni' ye nə satikà' ngòyis fis fa bwìŋ bəp awo sè wo à gùu pwe', mvèsə nè mvèsə.

²⁷ Ma nè bwìiŋ yàwo də ndàaŋwè pwe' nè kpə kè' mò'fis. Yi kpə wes, yi kə sak nzak bohòNwì.

²⁸ Ma nè Jisòs ye də yi à kpə sè' kè' mò'fis. Yi kpə mənə tu bwì, ngòjə fis lòbəp awo. Yi nè bwì vè fe'lə sə nzenngòŋ fɛɛŋ səmok. Yi vè nà'nə, kà mok ngòkè jə lòfis bəp bwì mok ye. Yi nə və ngòkè fa lùŋ bohòbùu sè wo sə tək yi wèŋ.

10

Satikà' Jisòs Nə, A Ye Kè'

Mò'fis, Nə Ye Mvèsə

¹ Lùuk bùu Jus wèŋ mègù co tsètsèn ngònitsè' nsəsəə bum sə bəboŋ sə yà'a nə kə ye ntsə'mòk. Kaco yà' niŋtsok riŋ pap nè pap mvè'nè bum yà'sə nè kə ye sə sè' yeŋ. Ngàa fa satikà' wèŋ

à sə fagè satikà'a sə lùumngòŋ pwe'. Nsàap satikà'a yà'sə à ka ñàaŋ sè ngògù ñwè nè yi dzəm ngòvè bohòNwì ye rərəŋ tse'. ² Yà' ànə tse'-a nsàp ñàŋ ànə bwèrɛ bwìŋ kà satikà' nùumbu lòoŋ ve'nə sə fahà. A ve'nə bùusè ànə ye-a də satikà'a sə à gù-a wo ngòye bèboŋ bwèrɛ ntuum awo kà mok də wo tse' malì nzak mok sə sahà fe'lè.

³ Mvè'nè wo ànə sə guhu yà' lùumngòŋ pwe'fo' fana satikà'a sə sə gu wo ngòtsərə malì bup awo sə səmok.

⁴ A ve'nə njo nè a yə nə riŋ də kaco nduəm mbòŋ kè ndzə tse' to ñàaŋ sè ngòyìs fis bup ñwè yeŋ.

⁵ Nà'a njo nè Jisòs à ye ngòvè sə nzeŋgòŋ, yi cep bohòNwì də ve'ɛ.

<<Wù ka satikà' nè wo fa nà' bə bum sè co nàm dzəm.

Wù a gù fa mu le ngùpni' nè mu nə fa wu satikà' fo'.

⁶ Wo jəgè yà', nə tɛŋ vəpsə də wo sə fa satikà', kè sè wo fagè yà' də ya yà'a yis fis gesə fa wo bup awo nà'a,

Wu kà bə zeŋ sè' kwagè.

⁷ Ye də mù cèp yàm də,

<Nwì, mu nè'.

Mù vè ngòkè gù yusè wu nə kwa bə zeŋ,

Mvè'nè wo à com nòŋsə ndzənə ñwàk yònə.> >>

⁸ Yi à cèp ncèp ànə, yi duk yà'sə də satikà'a sè bwìŋ fagè yà'sə, Nwìi kà bə zeŋ kwagè. Satikà'a sè wo à sə fa yà'sə yusè lùuk bùu Jus wèŋ à sə dzəm zeŋ.

⁹ Fana yi cep fe'lə sè' də, <<Mu nè', mù vè ηgòkè gù yusè wu nə kwa bə zeη.>> Sə nitsè' jəja də yi sə jə fis gesə lùk nè zəm nə ηgòjə vè mok lùk nè fi.

¹⁰ Vesùwèη ηga'a mok rərəη bùusè Jisòs a gù yusè Nwì dzəm sə. Yi à jə ni' ye, nə fa nà' co satikà' kè' mò'fis, nə kərə təη ve'nə.

¹¹ Ngàa fa satikà'a sè mantombi wèη à sə təη ηgògùhù fàak awo bohòNwì nùumbu pwe'. Ghà nè wo sə fàk pwe' wo sə fa megu sè' nsàp satikà' nè mò'fis nè wo fagè səsə nə. Yusə də, kaco nsàp satikà' ànə yis fis to bup sè bwìη a gù sə yeη.

¹² Ma nè bohòJisòs Krest ye, yi à fa satikà' nje kè' mò'fis nè nà' tse' ηàη ηgòyis fis fa bwì bup awo mvèsè. Yi à gù wes ve'nə, yi lo, nə kə cum yuye nze bo ma mà'a Nwì.

¹³ Yà'a mvwe' ncum ye sè yi cu ηga'a fo', nə sə tək nùumbu nè Nwì nè gù, yi nəη tes kùu ye mətuhù bùu sè wo bèηgè yi pwe'.

¹⁴ Yà'a mvè'nè yi ànə jəη megu satikà' nè mò'fis, nə gu bùu sè yi à rəηsə wes wo sə də wo mam mok kəkərə ve'nə mvèsè.

¹⁵ Yòηsè nè Rərəη nə sə nitsè' fa vesùwèη jəja sè' də satikà' nè Jisòs ànə fa kè' mò'fis nə, nà' kərə sè' ve'nə. Yi ànə duk to də,

¹⁶ Tà nə à duk də,

<<Nè'e rùk nè mu nè zə nà' Vesiwèη ηga nùumbu nə kè dzèη.

Mu nə gu lùuk am ni sə ntùù wo,

Fana wo sə tsərə megu mok zeη nùumbu pwe'.>>

¹⁷ Yòηsè nè Rərəη sə cep malì sèmok də,

<<Mɯ nə swisə fa wo bum bɯp awo sè wo à gù pwe'fo'.>>

18 A ye-a də Nwì a swì wes fa bwì bɯp awo laŋ, ye də bwìiŋ teŋsə ɲòsə faha satikà' bùusè yà' ka fàk mok tse'.

Vesùwèeŋ Sooŋ Kɯəp Və BohòNwì Nə Kà Wəp

19 Bwema am wèŋ, nduəm sè Jisòs sə a nè tosə fa vesùwèŋ mandzè nè ɲòcà ni lòmvwè' sè Nwì cu sə nə kà wəwəp tse' laŋ.

20 Jisòs a nè tosə mandzè nè fi nè nà' tse' lùŋ nə laŋ. Yi a nè tosə nà' bə ɲùpni' ye. Yà' gù co yi a nè tosə ndàa sè ɲòni lòmvwè' dzon sə mɯ mvwe' ndap Nwì sè yà' reŋ càsə pwe' yà'a.

21 A tse' bə ɲà fa satikà' nè yi yam wùriŋ sè'. A yi nè yi sə kùk ndap Nwì nè nà'a bùu ye wèŋ pwe' yi.

22 Ye də vesùwèeŋ fa ntum avès bohòyi, nə kà sə mərə lok. A sooŋ kɯəp və bohòNwì bə ntuum avès pwe'fo'. Nduəm sè Jisòs sə a wèŋsə fa ves ntuum avès laŋ, a ka nzak mok tse' fe'lə. Yu səmoók sè' də, vesùwèeŋ mok bùu sè wo a cùk reŋsə ni' awo bə ndzəp sè rərəŋ.

23 Vesùwèeŋ təŋ mali guguŋ, nə sə naaŋ megu tu avès bə bum sè ànə duk to də a dzəm də yà'a nè kè vèə sə. A kà də a sə mərə fe'lə sə ntuu vès mok duk, bùusè Nwì a kàk ves laŋ, a rì sè' də yusè Nwì kàk yà', kaco yà' ca wà yeŋ.

24 Vesùwèeŋ lap mandzè nè ɲògù bwìŋ də wo tse' ntuum sè bəboŋ ɲòtse' dzədzəm bohòmòk bə mòk, nə sə gu fàak sè bəboŋ.

25 Vesùwèeŋ kà də a teŋsə ɲòsə vè mvwe' mò'fis ɲòkùksə Nwì mvè'nè bùu mok wèŋ a

teɲsə yà'a duk. A sə gu ghaha ɛ nsàp nè aco bwì tse' ntuum sè ngòlòmantombì. Vesùwèɲ gu ve'nə bùusè a rì də numbu nè Tà Jisòos nè bwì foho və nə kuəp laɲ.

Jəɲ ɲkərè, Kà Də Wu Mè'rè Zinə Nə Gu Bup Duk

²⁶ Vesùwèɲ riɲ mandzè nè zinə nə laɲ. A ye-a ɲga a rì nà' ve'nə nə me'rə noɲsə nà', nə sə gu bup fana ye də satikà' mòk nè wo nə fa fe'lə ɲgòyis fis nsàp bup ànə ka mòk cum fe'lə.

²⁷ Ye də ɲgəɲgàaɲ riɲ də yi cu bup bùusè yi rì də Nwì nè sak yi, yi gbɛ nzak. Nsàp lum mis mòk nè nà'a bə jòoɲ nə kə te' bərə fis bùu sè wo bəɲgè Nwì wèɲ liɛp.

²⁸ Ma nè bə lùuk Musì ye də, a ye-a ɲga ɲwè gù bupsə-a lùk ye, bwì ba kè te' ye yi bə lis fana wo zə megu yi zəə, wo nə kà manziɲ bohòyi koksè lok fuk.

²⁹ A ye-a də a məm̀vè' ànə ye də anə ye yè'sə va bohòɲwè nè yi jə mo Nwì co yu ywì'lə nzòɲ-ɛ? Bùsè a yà'sə də ɲwè ànə jə nduəm Krest sè wo à zɛ rùk fo', yà' nə yis fis fa yi bup ye sè' sə co yusè wà. Yi yàk Yòɲsè Nwì nè nà'a sègè bwìɲ nə sè' laɲ.

³⁰ Vesùwèɲ rì ɲwè nè yi a cèp də, <<Mɛ nə lak fəsə riɲ fòo bup mù. Mɛ nə lak kəa sè' mù.>> Yi à duk sè' də, <<Tà Nwì sakgè bùu ye wèɲ yi.>>

³¹ A ndònè bup bohòɲwè ɲgògbù sənə tam Nwì nè yi cu ɲwəm nə.

³² Wèɲ tsərə fəsə-a maɲkwèɲ ghà nè wèɲ ànə rɛɛɲ to bə bum sè ma nè Nwì nà'a nè. Ghà ànə

à ye, wèŋ sə ye ŋə' vɛ'ɛ wùriŋ, wèŋ kà ten̄sə. Wèŋ à ko ntum, nə təəŋ mali gʊgʊŋ.

³³ Bwìŋ à sə yà'rə kɛ'cà wɛŋ mvwe' bwìŋ, nə sə gʊ wɛŋ ŋgwap. Ghà nəmòk a ye sè' nè wèŋ ànə sə be'lə kɛ'cà wenə wèŋ ŋga wo sə yə ŋgə'.

³⁴ Wèŋ à sə koksə manziŋ bohòŋgàa ndap-ndzəm wèŋ. Wo fep jəŋ bum awèŋ, wèŋ kà yà' co yumok jə, bùusə wèŋ à sə rì də wèŋ tse' yumòk nè nà' cu mantombi nè nà'a nè kà bʊp yuk, nə boŋ ghak sè zen.

³⁵ Ye də kà də wèŋ sə soŋ fofo lo maŋkwèŋ duk, bùusə ŋwə nè yì ko-a ntum, nə təəŋ gʊgʊŋ tè kə lə fana yì nè tse' lələk nè ghaŋ wùriŋ.

³⁶ A bəboŋ də wèŋ kontum, nə təəŋ mali gʊgʊŋ. Ya ŋga wèŋ gʊ mvə'nə Nwì dzəm vɛ'nə fana wèŋ kə tse' bum sə yì à kək də yì nè fa bwìŋ sə yàwèŋ sè'.

³⁷ Yà' cu ndzənə ŋwək Nwì də,
<<Mvək momjo fana ŋwə nè yì nə və nə sə vəə. Yì nə kà tètè mok cu fe'lè.

³⁸ Bùu am sè wo gùgè yusə Nwì dzəm wèŋ nə cum fo',

Bùsə wo fa ntum awo bohòNwì.

A ye-a ŋga ŋwə nəmòk fofo maŋkwèŋ,

Ye də ntum àam nə kà bohòŋwə ànə kwa lok.>>

³⁹ Bohòvès yàvès, vès ka nsap bù nè vès nə fofo maŋkwèŋ ya vès nə bisə nà'nə yeŋ. Vès nə fa ntum avès lə bohòNwì ya vès nə kə tse' lùŋ nè nà'a nè kà mè yuk nə.

11

Yusə Aco Dzədzəm Gu To

¹ A ye-a nga ñwè tse' dzədzəm sə ntùè yi, ye yè'sə va? Yà' ye də yi rì pap də yusè yi sə naan tu fo' yà'sə yi nə tse' yà'. Yì riñ sè' də yusè yi ka yà' bə lis jəja vɛ'ɛ ye sə yà' cu tsə lì fo'.

² Nwì ànə kwa bohòbù njamòk wèñ bùusè wo ànə tse' nsàp dzədzəm ànə sə ntùè wo bohòyi.

³ Mvè'nè vesùwèñ tse' nsàp dzədzəm ànə fana a gù zey ñkuñ a rɛɛñ də Nwì à cèp mègù mɛ cùhu, nə gɛ nzenɡòñ nè'e fo'. A yà'sə də bum sè a sə yə yà' nga'a sə nze fɛñ bə lis yè'e, à tesə vè mvwe' bum sè kaco lis ye to yey.

Abè

⁴ Abè ànə tse' nsàp dzədzəm ànə ñkuñ nə fa Nwì fəfa nè nà' à bògha' nè tètà ye Ken. Nwì à jə yi sè' co ñwè nè kèkurè bùusè yi ànə fa ntum bohònà' vɛ'nə. Nwì a nitsè' fa ves də yè'sə vɛ'nə bùusè yi à jə bum sè Abè ànə fa yi sə. Abè nə à kpɛ lò-a sè ntinè bùè fana a sə yə'rə jə mali yumok bohòyi bùusè yi ànə tse' nsàp dzədzəm ènə.

Enòk

⁵ Enòk ànə tse' sè' nsàp dzədzəm ènə fana Nwì nə jəñ bisè lo yi mabu ñwəm, də ya nà'a kà kpɛ yə. Nwì à jə løyi, ñwè kà yi mok yə fe'lè. Yà' cu ndzənə ñwàk Nwì də ghà nè yi ànə cum ntòfo', yi à sə cugè ncu nè Nwì à kwa bə zey.

⁶ A ye-a nga ñwè ka nsàp dzədzəm ànə tse' fana kaco yi gɛ fuk Nwì kwa yey lok. Busè a ye-a nga ñwè nəmòk dzəm-a də yi və bohòNwì, yi nə fa tson ntum də Nwì cu fo' yo, nə dzəm sè' də Nwì ləkgè ndàanwè pwe' nè nà' làp vè yi.

Nuà

⁷ Nuà ànə tse' sè' nsàp dzədzəm ènə ɲkuɲ nə yu'rə mvə'nè Nwì à tsè' yi də ndzəp nè kè rwiɲ ntsə'mòk yà'a. Yi ànə ka bə lis ntòye fana yi dzəm yusè Nwì cèp sə, nə ɣu ɲɣwes mòk nè ghaɲ. Yi à ɣù nà' də ya yi bə bùu ye wèeɲ nə ni cum ca ghà nè ndzəp və-a fana wo luɲ. Yi ànə ɣu vɛ'nə fana bùu sè sə nzeɲgòɲ sə à gbù nzak bohòNwì. Anə ɣeɲ Nwì jəɲ yi co ɲwè nè bèboɲ bùusè yi à tse' nsàp dzədzəm ànə.

Abràham

⁸ Abràham ànə tse' sè' dzədzəm ènə ɲkuɲ yi nə yuk Nwì mvə'nè nà' à tsè' yi ɲgòmè'rə lak ye, nə lo mvwe' mok sè yi nə fa nà' sə. Yi à ye'e mè'rə lak ye, nə lo, ɲga yi ka mvwe' sè yi sə lòo sə sè riɲ.

⁹ A sè' bùusè yi ànə naaɲ tu bohòNwì vɛ'nə ɲkuɲ fana yi sə cum co ɲkùɲ mvwe' nze nè Nwì à kàk yi nə. Yi à sə nòoɲ kɛ'cà fo' məmve' duɲ. Yi ànə ye meɣu fo' bə mo ye Azik nə ye Jàkop mo Azik sè ànə ɣeɲ Nwì kak fa wo yàwo sè'.

¹⁰ Abràham à sə kùk gèsə lòye mantombi mvwe' lak sè Nwì. Yà' tə mənə kùum sè ɣuɣuɲ sè yà'a nə kà kèèɲ gbù yuk.

Sàra

¹¹ Sàra ànə tse' dzədzəm sè' nsàp ànə ɲkuɲ Nwì ɣu, yi zəuɲ, nə dzə fa Abràham mwe ɲga yi rɛɲ fop mvə nə càsə mvək. Yè'sə à ye vɛ'nə bùusè yi ànə tse' nsàp dzədzəm nè də kaco Nwì kak yumok, nə kà yà' ɣù yeɲ.

12 Bum yè'sə ànə ye nga Abràham nə rən fop mvə sè' bəboŋni. Yi ànə reŋ-a sè' vɛ'nə fana ŋgwì bù ye nə à kə ye co ŋkəŋkàaŋ sè mubu, nə ye ŋgwansa co ŋwè kà ta to.

13 Bùu sè njamòk yà'sə pwe'fo' à kpɛ nga bum sè Nwì ànə kak bwìŋ sè à ka wo kə tseŋ fana wo sə naaŋ mali tu bohòNwì. Wo à yə gèsə lòyà' sèsap, nə kwa bə zeŋ. Wo ànə sə cep fis mɛ cùhu wo jəja də wo sə nzeŋgòŋ fɛŋ ŋkùŋ wèŋ.

14 Ŋwèe cèp fis vɛ'nə fana ye də yi sə tsè' yà'sə də yi sə tsərə də lak ye sè lak sè cu mantombi mvwe' səmok.

15 Wo à swì bisə mvwe' sè wo ànə ye'e və to mantombi sə. Wo ànə sə tsərə mali-a yà', bwèrɛ də wo à bwì foho lòlaŋ.

16 Yusè wo ànə gɛ yàwo à ye də, wo à sə kùk gèsə lòlis awo mantombi mvwe' lak mok sè bògha' zeŋ, sè lak yà'sə ma mubu. Nà'a njo nè wo à sə togè Nwì də Nwì nè njàwo fana yà' kà Nwì bɛp nə. A rì də yè'sə vɛ'nə bùusè yi a gù tsərə nòŋsə fa wo mvwe' ncum awo yo.

17 Mvè'nè Abràham ànə tse' nsàp dzədzəm ènə fana Nwì à mùmsə yi, yi dzəm də yi nə fa nà' mo ye Azik nè mò'fis nə co satikà' anə ntèn. Yè'sə ànə ye nga Nwì ànə tsok Abràham nə sè laŋ də nà'a nè kə tse' ŋgwì bwìŋ wùriŋ. Yi sə dzəm mali ŋgòfa mo ye co satikà' anə.

18 Yi sə dzəm yè'sə nga Nwì à tsè' yi sè' laŋ də ŋgwì bù nè yi nè kə tse' nə, nè tesə bohòAzik nə.

19 Abràham à dzəm sə ntɛù yi də aco Nwì lokoksə to ŋwè mvwe' kpɛ. Aco a duk də Azik

nə ɲwè nè yi à kpɛ mè yè'sə laɲ, nə tesə və kə tseɲ tɛ' ye Abràham nə sèmok.

Azik Bə Jàkop Nə Ye Jòsep

²⁰ Azik ànə tse' sè' nsàp dzədzəm nà'nə ɲkuɲ yi se Jàkop bə Esò. Yi à tsòho fa yà'wèɲ bum sè bəboɲ sè Nwì nè fa wo yà' ntsə'mòk sə.

²¹ Anə ye sè' bùu nsàp dzədzəm ènə ɲkuɲ Jàkop se bwe Jòsep ba. Yi ànə se yà'wèɲ ɲga yi kɛp ɲgòkpɛ. Yi ànə sə gù yè'sə ɲga yi yəhə naaɲ mənə ntumbà ye, nə sə kuksə Nwì.

²² A ye sè' bùu nsàp dzədzəm ànə ɲkuɲ fana mvè'nə Jòsep ànə kɛp ɲgòkpɛ fana yi cep bə mvè'nə bwe Izùre wèɲ nè kə tesə ntsə'mòk mvwe' lak Ijip. Yi à tsè' fa yà' sè' də yi kpɛ, ɲga yà' cu ɲgòlòo, yà' jəɲ lo vəp ye sè'.

Musi

²³ Anə ye bùu nsàp dzədzəm ènə ɲkuɲ ma bə tɛ'ɛ Musi dzeɲ yusè ɲkum Ijip à cèep, nə kà wəp. A ye ɲga ɲkum nə à fa ɲàɲ də a ye-a ɲga bùu Izùre dzə-a bwembam, wo zə yà' pwe'fo'. Wo ànə ye ɲga mo nə bòwùriɲ fana wo swihi nà' munda'à ɲwɛ tɛ'.

²⁴ A ye bùusè Musi ànə tse' nsàp dzədzəm ènə ɲkuɲ fana mvè'nə yi à gɛ, yi dzeɲ də wo kà yi də à tək yi mo ɲkum Feròsə jə.

²⁵ Yi à dzəm də bògha' bohòyi ɲgòyə ɲgə' bə bùu Nwì bəbɛ', nə noɲsə ɲgòyuk lùm sənə bəp nè nà'a nè cà bisə ntsə'mòk wà.

²⁶ Yi à dzəm də a ye-a ɲga bwìɲ yà' yi njo ɲkum ɲgà gèm bwìɲ fana boɲ ghak yi lɛ zeɲ, nə noɲsə ɲgòtse' ghàha sè yà' cu mvwe' nze Ijip

pwe'. Yi à sè gù yè'sè vè'nè pwe'fo' bùusè yi à sè kùk gèsè lólis ye mantombi bə lələk nè nà'a nè kè ye ntsə'mòk.

²⁷ Musi ànə ye'e me'rə nze Ijìp sè' bùusè yi à tse' nsàp dzədzəm ànə. Yi à ka də aco ŋkum nè jok, nè gù yi yumok wəp. Yi à təəŋ gəgəŋ, nè sè lo mantombi co yi sè yə Nwì nè bwìiŋ kà yi mǝlisè yəgè nè bə lis.

²⁸ Yi ànə tse' nsàp dzədzəm ènə bohòNwì ŋkuŋ fana yi yeto ŋkà' Pasobà nè wo kàgè nà' də bùusè masinjà Nwì à cà la'à wo nà'a. Yi à tsè' fa bùu Izùre wèŋ də yà'a mis ŋgù ncùu awo bə nduəm ya masinjà Nwì nè ŋgà jə vè kpɛ vèə, nà' kà də nà'a zə bwe mbəmbam sè wo bwe tu bùu Izùre wèŋ duk.

²⁹ Bùu Izùre wèŋ à tse' sè' nsàp dzədzəm ènə ŋkuŋ nè kə to ndzəp nè bəbən nà'a sè kùhu co wo sè gi mǝmfèŋ. Bùu Ijìp wèŋ à də wo to yuŋ yà' fana ndzəp nè bək kurə lo wes wo wis.

Rahàp

³⁰ Anə ye sè' bùu nsàp dzədzəm ènə ŋkuŋ fana ŋka' sè wo à bom dzòŋ lak Jèrikù bə zəŋ kəəŋ gbù. Yà' à kəəŋ gbù ŋga bùu Izùre wèŋ sè gi dzòŋ yà' mǝnə nùumbu sàmba.

³¹ Rahàp nè yi à ye ŋwà sàhà nà'a ànə tse' sè' nsàp dzədzəm ànə ŋkuŋ kpɛ nè kà yi tsèŋ. Yi a jə bùu Izùre sè wo à vè co mfəəp ŋgòkè kùk ja'a lak sè fo' sè, nè swihi yà'wèŋ mǝnda'à yi. Ghà nè bùu sè wo à ka Nwì yuk à sè kpɛ fana Rahàp nè kà ye kpɛ.

*Bùu Mok Sè Wo
A Tse' Dzədzəm Sè'*

³² Mu ta-a wo bə liŋ mò'fis mò'fis wo kà kè mè. Mvək nè co mù tsoho fa wəŋ bə liŋ bwìŋ co Gidiyòbə Baràk, bə Samsì bə Jeptà, bə Devid bə Samwè nè ye ŋgàa tsòhòbum Nwì wèŋ yè'e bùè.

³³ Wo à màk dzè' bə lak mok wèŋ, nè ghak wo bùusè wo ànə tse' dzədzəm bohòNwì. Mok wèŋ à sak gaŋ bə mandzə nè bəboŋ. Bum sè Nwì à kàk wo pwe', wo à tse' yà'. Gwim wèŋ à lòho cù sè' bùu wo.

³⁴ Mok wèŋ à ni sə misè, mis kà wo jwèŋ. Bwìŋ lap də wo mak dzè' nè zə yà'wèŋ ca, wo swirə. Wo sə yəəŋ co wo jì nàŋ, nè sə gù fàak nàŋ ve'ε wù kà fùk. Mok wèŋ à tse' nàŋ, nè be' bù ŋgàa màk dzè' sè wo vè mvwe' lak mok wèŋ, wo caŋ.

³⁵ Bèba mok wèŋ à tse' dzədzəm ènə sè' nè jəŋ fe'lə bùu awo sè wo ànə kpɔ mvè'nè wo lòkok mvwe' kpɔ sèmok. Wo ànə yeŋsə mok wèŋ ŋgə' ve'ε nsàp nè wo à ləp kɔrə mok wèŋ vəp bə ntòk tətè wo kpɔ. Wo à sə yə ŋgə' ve'nə, wo kà də wo dzeŋ Nwì ya wo kà ŋgə' yə duk. Anə ye ve'nə bùusè wo ànə sə tsərə də wo nè kè lòkok mvwe' kpɔ nè kə cum ncu nè bəgha' zəŋ.

³⁶ Wo à sə ywì'lə mok, nè sə ləp mok wèŋ. Wo tasə mok bə kwəŋ, nè nisə wo ndapndzəm.

³⁷ Wo à təm zə mok wèŋ bə lìs, gwè' tirə mok ba, nè gwè' zə mok wèŋ bə fèk. Nsàp bù ànə wèŋ à ye ŋgàa jìŋ. Wo à sə nihi tse' ŋgùup nàm co cəək awo, bwìŋ sə yeŋsə wo ŋgə' ve'ε wùriŋ nè sə tɔksə wo.

³⁸ Wo à sə jàm ke'cà ŋgəà bə ndahà wèŋ. Wo sə noon ke' mvwe' mbwèè lìs bə sə mvè'ə wèŋ.

Nzenḡòèṇə à ka kèkürè bohònsàp bù àṇə ḡḡòcu ca yeṇ.

³⁹ Bùu yà'sə pwe' à tse' nsàap liṇ sè yà' sə yuhu malì fo' yè'sə bùusè wo àṇə tse' dzədzəm bohòNwì. Anə ye-a sè ve'nə fana wo à ka bum sè Nwì à kàk bùu ye sə tse'.

⁴⁰ Nwì àṇə sə fuhə nonṣə bum mok sè bògha' zeṇ də yà'a ye niè' nè vesùwèeṇ sè' fo' èṇə. Yi ḡu ve'nə ya yi be'lə vesiwèṇ ḡkuṇ nə ḡu də a ye kèkürè bəbɛ'.

12

A Kùk Tse' Megu Lis Avès

BohòJisòs

¹ Mvè'nə a yə də bwiiṇ ve'ɛ wùriṇ sè wo a ni fa ves mandzè nə, nə sè kùk nə ves fana a bəbòṇ də a mak gesə bum sè aco yà' jipsə ves pwe'fo'. A me'rə bup sè yà' lèṁ tse' ves co ndàm, nə təeṇ ḡuḡuṇ ḡḡòca ca nè nà' nòsə kùk ves də a caṇ èṇə.

² Vesùwèeṇ kùk tse' megu lis avès muni'i Jisòs. A yi nè yi àṇə muk fa ves mandzè də a tse' dzədzəm nə yi, nà'a nè kè mè ntsə'mòk sè' ndzə bohòyi anə. Yi à mè'rə fa ni' ye də yi kpu kpu marè'tu mu ntəeṇ, nə kà marè'tu nə co yumok jə. Yi àṇə ḡu ve'nə də ya yi kə tse' kwəkwa nè nà' cu mantombii yi nə. Yà'a mvè'nə yi cu mvwe' ḡaṇ Nwì sə munə kapràk bo ma zɛ.

³ Wèeṇ tsərə megu Jisòs nè ḡḡàa ḡu bup wèṇ à sè bèṇ yi fana yi ko ntum ye nà'a. Wèeṇ tsərə yi ve'nə ya kà də wèeṇ wo ḡga ntuum awèeṇ fi lo maṇkwèṇ duk.

4 Lù nè wèŋ sə lù nà' wèŋ bup nə, nà' ka nsap nè gugun nè co də wèŋ kpɛ bùu zɛŋ nà'a ntøkə dzeŋ.

5 Mù tsəm də wèŋ na swì bisə ncèp Tà Nwì nè nà'a gùgè bwìŋ wo sə ko ntəm, nè də yi sə to wèŋ də bwe ye nà'a laŋ. Yi sə cèp də,
<<Mo àm, a ye-a nga Nwì gù də wu ye ngə' bùu yumok sè wù gù fana wù kà jap bə zɛŋ ñàhà.

A ye-a nga yi sa'rə wu, wù kà də wu jok jò'o duk.

6 Wèŋ tsərə tse' də ñwè nè Tà Nwì dzəm yi nə, a sè' yi nè yi yeŋsəgè nà' ngə'.

Yi lèp mègù ñwè nè yi jə nà' co mo ye.>>

7 Ye də ngə' nè wèŋ sə yə nə yà'sə yəyərè nè Nwì sə fa wèŋ. Yà' sə nìtsè' də Nwì sə kotse' wèŋ yà'sə co bwe ye. Wèŋ à yə yuk mo nè yi gù bup, tè' nə kà yi lèp yo-à?

8 A ye-a də wèŋ sə gù bup, nə kà ngə' bùu zɛŋ mvè'nè bwe ye wèŋ yəgèə yə fana ye də wèŋ ka yà'sə bwe ye sè zìnə yeŋ. Wèŋ yà'sə bwe sàhà, sè wo ka tè' tse'.

9 Tè' avès sè wo à dzə ves ləpgè vesùwèŋ də a gù bup, vesùwèŋ sə dzəm fa wo də tè' avès wèŋ sə gù mvè'nə. Ye də kaco a dzəm fa ghak tè' avès nè mabu ya a tse' lùŋ yeŋ nà?

10 Ngə'ə sè tè' avès wèŋ yeŋsəgè ves mom ghàr yà'sə yegè mvè'nè wo rì də a vè'nə bèbon bohòwo. BohòNwì ye, yi yeŋsəgè vesùwèŋ ngə' bə mandzè nè nà'a nə tɛsə ves ngòye rərəŋ sè' co yi.

11 Ghà nè wo yeŋsəgè ves ngə' də a gù yusè bup fana a kà bə zɛŋ kwa. A kè dzèŋ maŋkwèŋ, ngə'

nè wo à yeŋsə ves nə jə və yusè bèboŋ. A ve'nə bùusè bùu sè wo yə-a nsàp ŋgə' ènə, nə jəŋ nà' co yusè bèboŋ fana nà'a nə gə wo ŋgòye kəkərè, nə cum yu awo bə ntəm nè fifi.

¹² Ye də wèeŋ nep tsə'rə bo bə kùu awèŋ bèboŋ, nə kà wò.

¹³ Wèeŋ gi sənə mandzè nè nà'a rərəŋ nə, ya kà də bùu sè wo sə cəhə cəhə wèeŋ foho cum lo wesə mok sə nze duk, a bèboŋ də wo gəŋ lɛ gəu.

Wu Dzèeŋ-a Nwì

Wù Kà Kè Swirè

¹⁴ Wèeŋ jihi nzòŋ ŋgòláp mandzè nè də wen bwìŋ pwe'fo' cum bə fifi. Wèeŋ jihi nzòŋ sè' ŋgòcu ncu nè nà'a rərəŋ, bəsə ŋwèe kà-a ncu nè rərəŋ cu, yi kà Nwì kè yə yuk.

¹⁵ Wèeŋ jəŋ ŋkərè ya kà də mòok mam maŋkwèŋ, nə kà bònəm nè Nwì nə kè tse' duk. Wèeŋ jəŋ ŋkərè sè' də kà də ŋwè nəmòok bùuŋ bohòwèŋ co lìcuk, nè wu jwèŋ nà', wu kè jwèŋ fe'lə-a yà pwe', yà' sə cuk megu mok cə'u nà'a duk. Nsàp bù ànə fagè ŋgə', nə sə gə bəpsə ncu bùu mok wèŋ.

¹⁶ Wèeŋ jəŋ ŋkərè ya kà də ŋwè nəmòok ko sàhà, nə kà mvək bə bum sè ma nè Nwì tse' duk. Esòànə ye nsàp ŋwè ànə fana yi seŋ mwè ye njo zuzù.

¹⁷ Wèŋ rì də à kè dzèŋ maŋkwèŋ Esònə lap mandzè də tè' yee se yi fana yà' kà fàk. Yi à wa fis ndzəplis, mandzè kà mok ŋgòkupsə yusè yi à gèu sə ye fe'lə.

¹⁸ Wèeŋ riŋ mvwe' sè wèŋ tə yà'sə. Wèŋ ka mvwe' sè bùu Izùre wèŋ ànə təeŋ ghà nəmòk fa'

yà'a təəŋ. Wo à təəŋ mʋwe' nda nè wo to nà' də Sinà. Aco ŋwè jwɛŋ nà' bə bo. Mvək ànə à ye, mis à kʋə, ndzəm seŋ, mareŋ kà mok reŋ fana fəfə sə ca nəbɔp.

¹⁹ Bùu sè wo ànə ye fo' sə wèŋ à yuk ŋga ntàŋ sə cèep, nə yuk ŋga ŋgì ŋwè cèp sè', fana wo lɛŋ duk də wo kà ŋgì mòk mok yuk fe'lə.

²⁰ Bùu sə wèŋ à cèp də yusè ŋgì ànə cep sə yà' gʋ gha' nàŋ. Ànə ye ŋga ŋgì nə cèp də, <<A ye-a ŋga ŋwè jwèŋ nda nè'e, a dzəm ye megu nàmŋgòn, wo təm zə yi bə lis.>>

²¹ Bum sè wo à yə yà' fo' à ye co wù caŋ bisə, fana Musì kə cep fis də, <<Wʋə ko mʋ, ni' ghə'rə mʋ sè'.>>

²² Bohòwèŋ yàwèŋ, wèŋ kə dzèŋ mʋwe' nda nè wo togè nà' də nda Zayòn nà'a laŋ. Wèŋ kə dzèŋ mʋwe' lak Nwì nè yi cu ŋwəm nə. Wo togè mʋwe' lak ye də Jòrosalèm nè mʋbu. Masinjàa Nwì wèŋ kə benə fo' nsàp nè co ŋwè kà ta to, nə sə sam kə'ca yu awo fo'.

²³ Wèŋ cu yàwèŋ mʋŋgorè bùu Nwì sè wo bwe tu bohòyi. Bwe sè yi ànə com noŋsə liŋ awo mʋbu anə laŋ. Wèŋ tə mantombii Nwì nè yi sakgè bwì pwe' yi nə. Wèŋ yàwèŋ bə bùu sè wo a sə gì bə mandzè nè Nwì fana Nwì nə gʋ wo ŋgòye kəkùrè sè' yà'a.

²⁴ Wèŋ a vè kə dzèŋ ŋgʋ ni' Jisòs nè yi ànə təəŋ mʋtsətsə'rəə ŋwè bə Nwì yi ghà nè wo ànə zʋ rùk nə. Wèŋ sə kùk gesə lo lis awèŋ mantombi mʋwe' ndʋəm ye sè yà' sə nìtsè' yumok sè bòghak zeŋ, nə noŋsə yusè ndʋəm Abè à sə nìtsè' sə.

25 Ye də wèeŋ jəŋ ŋkərè, nə kà ŋgì ŋwè nè yi sè cèp bohòwèŋ niè' dzèèŋ. Bù njamòk wèŋ ànə dzeen yusè ŋwè nè yi à sə tsòho fa wo ncèp nè Nwì à sə tsè' wo, nə kà kè swirè. Mvè'nè wo ànə ka swirè yà'sə, ye də, a ye-a vesùwèŋ sè a sə yuk ŋgì ŋwè nè yi sè cèp vèsə ma mubu nə, nə dzeen nà' sè', a kə swirə yàvès ŋga a gù va?

26 Ghà ànə à ye, ŋgì Nwì gù nzeŋgòpwe' tsoho. Nè ŋga'a nè'e yi kà' də, <<Mù nə tsè'rə nzeŋgòn nə kè' mò'fis sèmok ŋkuŋ. Mù nə tsè'rə nà' mok bə ntòbu ba fo'.>>

27 Ncèp nè də, <<kè' mò'fis sèmok,>> nà'a sè nitsè' ves də Nwìi nə fis gesə bum sè yi ànə gù yà' sè aco yà' tsoho pwe'fo', ya ŋga a cum megu mok bum sè yà' kà tsòhòto.

28 Vesùwèeŋ kwasə Nwì bùusè yi a nòŋsə ves mvwe' gaŋ sè kaco yumok tsərə to yà' yeŋ. Vesùwèeŋ kwasə yi, nə kuksə nə wəp yi sè' nsàp nè co yi kwa bohòvès sè'.

29 A gù ve'nə bùusè Nwì àvès nə yi co nsàp mis mòk nè nà'a tèn səsəgè bum pwe', nə kà yumok mè'rè lok fùk.

13

Yusè Aco Yà' Gù Nwì Yi Kwa

1 Mù dzəm ŋgòtsè' fa wèŋ də, wèeŋ yà'sə bwema mvwe' mò'fis, wèeŋ sə dzəm mòk bə mòk sè'.

2 Wèeŋ muk nòŋsə ncùu awèŋ to bohòŋkùŋ wèŋ. Bùu mok wèŋ ànə gù to me ve'nə laŋ, nə nisə masinjàa Nwì munda'à wo anə ŋga wo ka riŋ.

³ Wèeṅ kà bùu sè wo cu mu ndapndzəmè swi. Wèeṅ sə koksə manziṅ bohòwo co wenə wèṅ cu be'lə mu ndapndzəmè anə bəbɛ'. Wèeṅ sə tsərə bùu sè wo sə yə ṅgə' sè', bùusè wèṅ tse' yàwèṅ ṅgùpni' sè' co wo.

⁴ A bəboṅ də ndàaṅwè pwe' nonṣə lùuk sè yà' cu mʉtsətsə'rəə ṅgwe bə ndum. ṅgwe ye zinə bohòndu ye, ndum ye bohòṅgwe ye sè' vɛ'nə. Wèeṅ rɛɛṅ də Nwii nè kə sak ṅgàa koho sàhà bə ṅgàa ko nto wèṅ.

⁵ Wèeṅ jəṅ ṅkərə də wèeṅ kà mbàm lələ dzəm ti'. Wèeṅ tse' lɛ ntum nè də yusè wèṅ tse', yà'a kəkərə bohòwèṅ. Yà'a ye vɛ'nə bùusè Nwi a cèp də,

<<Ncèp nè co mu nə swi yuk weṅ ka yeṅ lok fuk.>>

⁶ Ye də a baṅ ntum nə cèp də,

<<Tà Nwii ṅgà ko fa ves gèm àvès yi, mu nə kà yumok wəp,

Busè kaco ṅwè gu mu yumok yeṅ saam.>>

⁷ Wèeṅ tsərə bùu sè wo à ni fa to weṅ mandzè, nə tsoho fa weṅ ncèp Nwi yà'a. Wèeṅ tsərə ncu nè wo à cu, nə dzəmtse' bohòNwi sè' mvè'nè wo à dzəmtse' yàwo yà'a.

⁸ Jisòs Krɛst kà kupsəgè, ntinə bə zòṅ bə luwa pwe', yi mègù mvè'nè mò'fis.

⁹ Wèeṅ jəṅ ṅkərə, kà də bum sè bwìṅ sə yə'rə vè yà' fi kupsə ntuum awèṅ, wèṅ me'rə mandzè nè zinə nə duk. Bòvəm nè Nwii nə gʉṅsə ntuum awèṅ yi. Lùuk sè ṅgònòṅsə yà' bə nzak zuzu ka fàk tse'. Yà'a kà bùu sè wo nòṅsəgè yà' bə yumok tɛsəgè.

¹⁰ Mvwe' mok cu sè wo a fa satikà' bùu vès fo'. Ngàa fa satikà' sè wo sè fàk mvwe' taap cèk sè wo sè kùksè Nwì mbwa wèŋ ka mandzè nè co wo kə zə bum satikà' avès tse'.

¹¹ Nkum ngà fa satikà' wèeŋ fagè Nwì satikà' njo bəp yi. Yi cu ngògù yà', yusè yi jəŋ nisə və məmvwe' ndap Nwì nè ghaŋ nə, mēgù nduəm nàam sə. Bwìŋ bək fis gesə lo nàam sə muntòlak anə fo', nə kə tɛŋ səsə yà', ŋwè kà zə.

¹² Yà'a mvè'nè Jisòs bə tu ye à kə kpə ma sə mbi sə, ya yi rɛŋsə fis fa bwìŋ bəp awo bə nduəm ye sə.

¹³ Ye də vesùwèeŋ tesə yàvès muntòlak anə sè', nə kə tseŋ yi, ya bwìŋ yàk jamsə yi, vesi wèŋ ye lok ca bəbɛ'.

¹⁴ A vɛ'nə bùusè a ka lak sè yà'a nè cu mam mali fo' sə nzeŋgòoŋ fɛŋ tse'. A sə kùk gèsə lo lis avès mantombì mvwe' lak sè anə kə cu fo' ntsə'mòk sə.

¹⁵ Vesùwèeŋ sə kwasə Nwì nùumbu pwe'fo'. Kwəkwasè avès nə nə ye co satikà' nè a sə fa nà' bohòKrest ngòcàsə fa bohòNwì. Satikà' nə nè cù sə fa nà' yi, cùu sè yà'a dukgè də Jisòs Tà.

¹⁶ Kà də wèeŋ swi ngògù fa bwì bəboŋ duk. Bum sè wèŋ tse', wèŋ fa bùu sè wo ka tse' yàwo sè', bùusè yà'sə nsàap satikà'a sè Nwìi kwagè bə zəŋ sə.

¹⁷ Wèeŋ yuk duk bù ŋkwàha bùu awèŋ, nə jəŋ lo ni' awèŋ sə nze bohòwo. Wo sə kùk wəŋ wo co bùu sè wo nè kə təəŋ ntsə'mòk kə mantombii Nwì, nə tsoho fa nà' fàha yàwo sè wo à gùu. Wèeŋ yuk wo ya ŋga wo tse' ntuum sè kwəkwa mvè'nè wo sə gù fàak sə. Wèeŋ kà-a vɛ'nə gù,

ye də wo nə sə fak manziṅ manziṅ, fàak awo sè wo sə gùu sə kà wenṅ bə yumok sè' tesè.

¹⁸ Wèenṅ sə lenṅ fa ves nùumbu pwe'fo'. Vès rì tse' də ntuum avèes rərəṅ. Vèes dzəmgè yàvès ṅgògè bum pwe' bə mandzè nè nà'a rərəṅ nə.

¹⁹ Mù lenṅ wenṅ ve'ε wùriṅ də wèenṅ sə lenṅ fa ves, ya mu tse' mandzè nè co mù və kə ye fe'lə wenṅ sèmok jəjo yè'sə.

Pìriyà Nè Nḡà Còm Nḡàk Nè'e A Gùu

²⁰ Nwì nè yi fagè bwìṅ fifi sə ntuu a lòkoksə Tà Jisòs mvwe' kpə. Nduəm Jisòs a gù rùk nè à zu ves Nwì wèṅ nə ṅgòtəṅ mam guguṅ nè mvèsè. Jisòs nə co ganakù' nè ghaṅ nè yi sə kùk vesùwèṅ sə a bùu ye sə.

²¹ Ye də mù lenṅ də yi nə gu wèṅ ṅgòye kèkurè, nə kà yumok jamè. Wèenṅ gu bum sè yi sə dzəm də wèenṅ gu yà'. Mù lenṅ sè' də Nwii fak sə ntuu wèṅ casə ndzə bohòJisòs Krest, ya ṅga a cum nsàp ncu nè aco nà' gu yi kwa bə zenṅ. Kèkùksə ye bohòyi Jisòs Krest nə mvèsè nè mvèsè. Yà'a ye ve'nə.

Ncèp Nè Nà' Lèsə Mbwè

²² Bwema am wèṅ, mù lenṅ wenṅ də wèenṅ ko ntum, nə yu'rə ncèp àm ènə. Nḡàk nè mù com fa wenṅ nə ka sèsap yeṅ.

²³ Mù dzəm də wèenṅ riṅ də moma avès Timati a tesə ndapndzəm ṅga'a mok laṅ. Yi kè tsèṅ-a mu nènàk, vesi və kə ye wenṅ bəbè'.

²⁴ Wèenṅ cepsə fa mu bùu awèṅ sè mantombi bə mok sè wo bùu Nwì wèṅ pwe'fo'. Bwema sè mvwe' nzenḡon Itali yà'a wèṅ cepsə wenṅ bəboṅ.

²⁵ Bèbo nè Nwìi ye bohòwèṅ lònṅ fo'. Yà' a ye ve'nè.

Nwàk Nwì Ma Rùk Nè Fì
New Testament in Yamba

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

c475d5b3-da44-51cf-93ca-f255b72fe481